

# NDINGA YA KIDIMBU



Matondo na nge. Bika beto vwanda kaka ya kutelama mwa ntangu fyoti, na yina beto ke tanga Ndinga, kukwenda mbala mosi na Ndinga na nkokila yayi, samu beto baka ntangu mingi ve. Mu zola ti beno baka na munu, na nkokila yayi, na Buku ya Exode, mpe kubanda na kapu 4 ya Buku ya Exode.

*Mpe Moise vutulaka mpe tubaka, Kasi, tala, bawu ke kwikila na munu ve, mpe ke kuwa ndinga ya munu ve: samu ti bawu ke tuba, MFUMU me monika ve na nge.*

*Mpe MFUMU tubaka na yandi, Yinki yina kele na diboko ya nge? Mpe yandi tubaka, Nkawa.*

*Mpe yandi tubaka, Losa yawu na ntoto. Mpe yandi losaka yawu na ntoto, mpe yawu kumaka nyoka; mpe Moise tinaka na ntuala ya yawu.*

*Mpe MFUMU tubaka na Moise, Tanda diboko ya nge, mpe simba yawu na mukila. Mpe yandi tandaka diboko ya yandi, mpe simbaka yawu, mpe yawu kumaka nkawa na diboko ya yandi:*

*Na yina bawu lenda kwikila ti MFUMU Nzambi ya batata ya bawu, Nzambi ya Abraham, . . . Nzambi ya Isaac, . . . Nzambi ya Jacob, me monika na nge.*

*Mpe MFUMU tubaka dyaka na yandi, Tula ntangu yayi diboko ya nge na ntulu ya nge. Mpe yandi tulaka diboko ya yandi na ntulu ya yandi: mpe na ntangu yandi basisaka yawu, tala, diboko ya yandi vwandaka na wazi mutindu mvula-mpembe.*

*Mpe yandi tubaka, Tula dyaka diboko ya nge na ntulu ya nge. Mpe yandi tulaka dyaka diboko ya yandi na ntulu ya yandi; mpe basisaka yawu na ntulu ya yandi, mpe, tala, ya . . . kumaka dyaka mutindu nsuni ya yandi yankaka.*

*Mpe yawu ke salama ti, kana bawu kwikila na nge ve, kana bawu kwikila ve na ndinga ya kidimbu ya ntete, ti bawu ke kwikila ndinga ya kidimbu ya zole.*

<sup>2</sup> Beto kulumusa bayintu ya beto. Mpe na bayintu ya beto ya kulumusa, mpe bantima ya beto, mpe, mu ke kukiyufula kana ya kele na muntu awa na nkokila yayi yina kele na balombilu samu na kisambu? Beno lenda bika yawu kuzabana na yina beno ke telemisa maboko ya beto. Nzambi pesa mvutu na balombilu ya beno.

<sup>3</sup> Tata ya beto ya Mazulu, beto ke tala yayi bweso mosi ya nene, na kukwiza na Nge na kisambu, na kukwiza na Nkumbu ya Mfumu Yesu. Mpe Yandi silaka beto ti, kana beto lomba kima

mosi na Nkumbu ya Yandi, ya ke pesama. Nge zaba nsatu ya mosi na mosi ya beto. Nge zaba yinki maboko ya beto ke monikisa na yina yawu me telama. Mu ke sambila, Tata, ti Nge ke pesa mvutu na konso lombilu na nkokila yayi. Kuzwa nkembo.

<sup>4</sup> Mpe ntangu yayi bika ti Mulongisi ya nene ya Ndinga, Mpeve-Santu, kukwiza na zulu ya beto, na nkokila yayi, mpe kumonikisa Yandi mosi na beto, mpe—mpe kusala Yandi mosi kuzabana na beto, na nzila ya kimbangi ya mvumbukulu ya Yandi. Bika ti Yandi kwiza na kati-kati ya beto, na nkokila yayi, Mfumu, mpe—mpe kutala bantima ya beto. Zonza na beto na nzila ya bima yina Yandi silaka samu na kilumbu yayi. Bika ti Bandinga yina ba silaka samu na ngunga yayi kumonisama na ntuala ya beto, samu beto vwanda na kivuvu, na ntangu yayi ya mpasi yina Nge tubaka ke kwiza na zulu ya ntoto, samu na kumeka bantu nyonso. Mpe ya kieleka ya me kuma na ntangu yina, Tata, na ntangu ba ke meka bantu. Mpe ya kele na mutindu mingi, tii muntu mosi ve na mpasi zaba yinki ya kusala. Kasi, Mfumu, mu ke sambila ti Nge ke talisa na beto, na nkokila yayi, ti Nge kele awa mpe na beto, Yawu kele awa samu na kusadisa beto. Pesa mvutu na balombilu ya beto, samu beto ke lomba yawu na Nkumbu ya Yesu. Amen.

Beno lenda vwanda.

<sup>5</sup> Mu me vwanda kaka mwa fyoti lutale konso nkokila. Mpe mu ke landilaka kaka na kubanza na kusadila microphone *yayi*, kasi ya kele yina ba ke sadilaka ba-magnetophone. Kasi yayi *awa*, *mu* banza, kele yina mu fwana kuwa, to kuzonzila.

<sup>6</sup> Mbasi na nkokila ke vwanda nkokila ya feti ya nene, na yawu beno zimbana yawu ve. Mu banza ti ya kele. . . Mu banza ti ba zabisaka yawu na ntuala, na kisika bantu fwana kwenda.

<sup>7</sup> Ya kieleka beto ke sepela na ngwisani ya beno na bima ya nene yina Mfumu ya beto me sala.

<sup>8</sup> Ntangu yayi, na nkokila yayi, mu banza ti, kana ti beto zaba ve Ndinga ya Nzambi, beto me zaba ve yinki kusala. Beto lenda vwanda ve na lukwikilu tii beto ke zaba yinki kele luzolo ya Nzambi. Mpe, yinki, na yina kana beto zaba ti ya kele luzolo ya Nzambi, Ndinga ya Nzambi ke tuba kima, na yina beto ke na kiese na kulanda yawu.

<sup>9</sup> Ntangu yayi kana Mfumu Yesu vwandaka tambula, Yandi mosi, na zulu ya ntoto na nkokila yayi, na nzutu ya muntu, mpe Yandi tuba, “Mbasi mvula ke noka, kilumbu ya muvimba,” ntangu yayi ya ke vwanda kieleka mpasi ve samu na munu na kubaka parapluie na ntangu mu ke basika na suka, samu ti Yandi me tuba yawu. Ntangu yayi, kana Yandi tubaka yawu ve, kuna mu zaba ve yinki kuingila. Na yawu ya kele mutindu ya kele, na kima nyonso beto ke salaka, beto zola kuzaba ngunga, nsungi beto ke na kuzingila.

<sup>10</sup> Mpe samu na bantu ya malu-malu, sabala yayi beto me meka na kutalisa ti Nzambi, kubanda na mbandukulu, zabaka nsuka. Yina ke sala Yandi yina kele na nsuka ve. Kana Yandi kele ve yina keke na nsuka ve, yina kele na nsuka ve, Yandi kele ve Nzambi. Mpe Yandi fwana vwanda yina kele na ngolo nyonso, yina kele bisika nyonso, yina zaba nyonso, mpe yina kele na ngolo nyonso, samu na kuvwanda Nzambi. Yina kele ngolo nyonso, zaba bima nyonso, na bisika nyonso, mpe—mpe—mpe zaba nsuka kubanda mbandukulu. Kana Yandi kele yawu ve, na yina Yandi kele Nzambi ve.

<sup>11</sup> Na yina ya kele ve na kima mosi ya kieleka na lweka. Ya kele beto. Kasi kima ve na kati ya Ndinga ya Nzambi; ya ke na kubaluka kaka mutindu monte. Mpe na ntangu ngunga yina ke kwisa samu na yawu na kusalama, Ndinga yina me monisama samu na nsungi yina, ya ke salama. Beto lenda banza ti ya ke kwenda. . . ya ke salama ve. Ya ke salamaka bantangu yankaka mpe beto ke zabaka yawu ve. Yesu tubaka, kilumbu mosi. . .

<sup>12</sup> Ba tubaka na Yandi, “Samu na yinki ya kele. . . misoniki nyonso ke tuba ti ‘Elie fwana kwiza ntete?’” Beno me mona, ntangu yayi, bawu kwikilaka yawu. Bawu kwikilaka ti Elie vwandaka kwisa.

<sup>13</sup> Mpe Yesu talaka bawu, mpe tubaka, “Elie me kwisa yimeni, mpe beno zabaka yandi ve.” Beno me mona? Ntangu yayi, beno me mona, ya lutaka kaka na zulu ya bawu misoniki, milongi, bilandi. Mpe ya vwandaka Jean Baptiste, mpe yandi kwizaka na mutindu nyonso yina Elie zolaka kwiza, kasi bawu zabaka yandi ve.

<sup>14</sup> Mpe ntangu yayi ya me tala beto na kuzaba ngunga yina beto ke na kuzinga, mpe ntangu beto ke na kuzingila. Na zulu ya yawu, mu zola zonzila na nkokila yayi, na: *Ndinga Ya Kidimbu*.

<sup>15</sup> Dilongi ya ngitukulu, kasi Nzambi ke salaka mambu ya ngitukulu na mutindu ya mumesanu ve. Ya kele yina ke salaka Yandi Nzambi, samu ti Yandi kele—Yandi kele ya kimpeve. Mpe nyonso yina Yandi ke salaka, Yandi—Yandi ke salaka yawu, Yandi lenda sala yawu na kimpeve, samu ti Yandi kele ya kimpeve.

<sup>16</sup> Ntangu yayi, *Ndinga Ya Kidimbu*. Mpe ya kele. . . Kidimbu kele na ndinga. Menga kele na ndinga. Menga bokaka na ntoto, mpe—mpe nyonso yina, “Menga ya kusungama ya Abel bokaka na kutelemina Cain.” Mpe Biblia ke tuba, “Menga ya Yesu Klisto ke zonga bima ya kulutila nene kulutila menga ya Abel kusalaka.”

<sup>17</sup> Ntangu yayi kimoko ya beto na nkokila yayi, to disolo ya beto, ke banda na Exode. Mpe ntangu ya Exode kele ntangu yina ba ke bokila na kubasika, mpe exode vwandaka me kuma pene-pene.

<sup>18</sup> Moise, kisadi ya Mfumu, ba bokilaka yandi na nzila mosi—mosi ya kusalu. Mpe na kusalaka yina yandi banzaka, yandi longokaka mingi na Égypte, longokaka ndwenga nyonso ya ba-Egyptien, mpe na kutala yandi vwandaka na nzila mosi, yina na kuvwanda soda ya nene ya kulutila mayele, ti yandi vwandaka na lenda ya kukuula bantu ya yandi na yisi ya kimpika yina, samu ti yandi vwandaka Pharaon yina ke kwisa na ntwala. Mpe wapi mutindu kukondwa mpasi ya zolaka vwanda samu na yandi na kusala yawu. Kasi, beno me mona, kana yina zolaka vwanda dyambu, na yina ya zolaka vwanda dyambu ya yinza.

<sup>19</sup> Nzambi ke bakaka ve bima ya yinza. Yandi ke bakaka bima ya kimpeve na kusiamisa Yandi mosi.

<sup>20</sup> Na yawu na kati ya bamvula makumi yiya ya ndongosolo, ya zulu mingi yina yandi lendaka kuzwa, mpe ya kulutila mbote yina yandi lendaka kuzwa, muntu ya kulutila mayele yandi zolaka vwanda; na lubakusu ya mama ya yandi, mulongisi ya yandi, ti yandi zolaka vwanda mosi samu na kukuula bantu; mpe yandi kwendaka na ngolo ya lubakusu ya yandi, mpe yandi kufwaka muntu ya Égypte. Mpe, kuna, yandi talaka ti ngolo ya yandi kondwaka, mpe na yina yandi kimaka na ntoto ya kuyuma.

<sup>21</sup> Mpe yina Égypte, na ndongosolo, tulaka na kati ya yandi na bamvula makumi yiya, ya bakaka Nzambi bamvula makumi yiya yankaka samu na kubasisa yawu na yandi, beno me mona, na yawu yandi zolaka tula kivuvu ve na malongi ya yandi ya lukolo. Yandi zolaka tula kivuvu na kimpeve.

<sup>22</sup> Mpe ntangu yayi ntangu vwandaka me kuma pene-pene yina Nzambi salaka nsilulu, na Abraham, bamvula nkama yiya na ntwala ya ntangu yina, ti nkuna ya yandi ke zinga na yinsi ya nzenza, mpe ba ke basisa bawu. Na manima ya bamvula makumi yiya, ba ke basisa bawu na diboko ya ngolo. Yandi zolaka vuukisa bantu ya yandi na nzila ya diboko ya ngolo. Mpe ntangu nsilulu vwandaka me belama, ya kele ntangu Nzambi tulaka na kusalu. Moise, na kati ya kukondwa ya yandi ya muvimba, kwendaka na ntoto ya kuyuma.

<sup>23</sup> Ntangu yayi kifwanukusu awa, ya kele na kifwanukusu ya mbote yina kieleka beto zola kondwa ve. Beno me mona? Kifwanukusu, Nzambi vwandaka nata Israel, bantu ya Yandi, na kubasika, na yinsi mosi, yinsi mosi na yinsi mosi. Yinsi mosi na yinsi mosi, kifwanukusu ya kitoko ya bubu yayi, ti Nzambi ke na kubokila Kento ya Yandi ya makwela na kubasika na dibuundu mosi, Kento ya makwela ya Muklisto na kubasika na dibuundu ya Muklisto, Dibuundu Kento ya makwela na kubasika na dibuundu, yina ba ke bokila, na Biblia, yina ba soolaka.

<sup>24</sup> Mu kele na banoti mingi mpe Masonuku ya kusonama awa, na zulu ya leso yayi na nkokila yayi.

25 Yina ba ke bokilaka, bantangu yankaka, “Musolami, Muponami, to Yina bikanaka ya nkuna ya kento.” Ba bokilaka Yandi, “Kento ya makwela,” yina Nzambi, na nzila ya luzabu ya Yandi ya mantwala, kubikaka na kuvwanda. Yina kele, Kento ya makwela kubasika na dibuundu. Beno me mona, kima ya muvimba kele dibuundu, kasi Nzambi ke basisa bantu na dibuundu yina, yina kele Kento ya makwela. Yandi tubaka ti Yandi ke sala yawu. Mpe Yandi salaka yawu, beno tala, to Yandi ke sala yawu.

26 Beno tala, beno mona mutindu Yandi salaka yawu, mpe maniele mpe mutindu Yandi salaka yawu. Beto zola kutala na yayi ntangu yayi, mutindu Yandi basisaka Israël, mutindu Yandi salaka yawu, mpe mutindu yina Yandi—Yandi salaka yawu.

27 Beno tala ntangu Ndinga ya nsilulu zolaka salama, Nzambi bokilaka Moise, na nzila ya nsodolo ya ntete, mpe soolaka yandi na kisalu. Beno me mona? Nzambi ke vwandaka ntangu nyonso na muntu ya kulunga, na ntangu ya kulunga. Kima ve ke kondwaka na Nzambi. Yandi tubaka yawu; ya lenda kondwa ve. Kana ya kondwa, na yina Nzambi me kondwa, samu ti Nzambi kele Ndinga.

28 Beno tala, ntangu yayi, Ndinga zolaka monisama. Mpe na ntangu Ndinga fwana monisama, ya nsilulu, Nzambi ntangu nyonso ke tindaka profete na kutalisa nsilulu yina, samu ti Ndinga ya Mfumu ke kwizaka na yandi.

29 Moise, soolamaka na ntwala samu na lukanu, vwandaka ya kubokila na kisalu. Muntu yankaka ve zolaka sala yawu.

30 Ntangu Nzambi me—me bokila muntu samu na kisalu ya kusala, ya kele ve na muntu yina lenda baka kisika ya yandi. Ya kele na muntu ve lenda baka kisika ya nge, nge kele mutindu yankaka.

31 Mutindu ntangu yankaka mu ke kukiyufulaka, mutindu mu ke zola kubaka kisika ya Oral Roberts, mutindu mu ke zola kubaka kisika ya Billy Graham, muntu ya mutindu yina. Mutindu Billy Graham, kukwenda zonga na nkonga ya bantu, kubokila misumuki na autel; kuzimbana yawu mpe kuvutuka na yinzo, kukondwa kutelama kuna mpe kunwana dyaka. Mu lenda vwanda Billy Graham ve, kasi to lenda Billy Graham na kuvwanda munu. Beto zole kele. . . Mu lenda vwanda Oral Roberts ve; Oral Roberts lenda vwanda munu ve.

32 Beno kele, mosi na mosi, ya kuvwanda na ekonomi ya Nzambi, kaka na kisika ya beno. Mosi ke manga kudya ntangu nyonso mpe ke solula na Nzambi, na yina mosi yankaka ke basisa bampeve ya yimbi samu ti yandi yina ke na kumanga na kudya. Kasi ya kele Nzutu ya muvimba ya Klisto yina ke na kusala kintwadi, na kimosi. Ntangu beto ke mona bibaka ya denomination yayi kukabula beto, ya kele yina ke nyongisa

ntima ya munu, beno me mona, samu ti ya kele kima yina ke kabulaka beto. Beto kele mosi.

<sup>33</sup> Ya kele ve na bantu ya nene na kati-kati ya beto, ata bantu ya nene na kati-kati ya beto. Beto nyonso kele mutindu mosi. Beto kele bana ya Nzambi. Ya kele kaka na mosi ya nene na kati-kati ya beto, mpe ya kele Klisto. Beto fwana zaba Yandi. Mpe kana beto ke sosa lukumu, mosi na yankaka, beto lenda vwanda ve na lukwikilu, samu ti beto ke na kuzwa lukwikilu mosi na yankaka. Beto fwana vwanda na lukwikilu na Klisto. Yandi kele Yandi yina na kati ya yina beto fwana vwanda na lukwikilu, mpe na manima lukwikilu na yina Yandi ke na kusalaka mpe me pesa beto.

<sup>34</sup> Ntangu yayi, muntu ve zolaka baka kisika ya Moise. Ata bambala yandi ke tina, mpe ata bambala yandi mekaka na kutina yawu, kasi Nzambi zaba yina Yandi ke na kusalaka. Yandi zabaka kaka yina Yandi zolaka baka mpe kusala na Moise. Bima yayi fwana salama. Ntangu yayi, beno tala mbote, muntu ve zolaka baka kisika ya yandi.

<sup>35</sup> Ntangu yayi beno tala mbote. Nzambi pesaka yandi kidimbu, samu na kusiamisa lubokilu ya yandi mpe kutuba ya yandi, ntangu yandi kwendaka na Egypte.

<sup>36</sup> Ntangu yayi, Nzambi ke pesaka ntangu nyonso munatinsangu kidimbu, mpe ndinga ya kidimbu yina. Mpe kidimbu yina ke talisa muntu yango, kana ya kele ya kusunama na kati ya Masonukwa.

<sup>37</sup> Mutindu Jean tubaka, “Mu kele ndinga ya muntu yina ke na kuboka na ntoto ya kuyuma.”

Bawu tubaka, “Nge kele Mesiya?”

<sup>38</sup> Yandi tubaka, “Mu kele Mesiya ve. Kasi mu kele ndinga ya muntu yina ke boka na ntoto ya kuyuma, mutindu profete Esaie tubaka.” Yandi lendaka kukitalisa pwelele yandi mosi.

<sup>39</sup> Mpe ntangu yayi, kuna, na yina, beto ke tala ti Nzambi, ntangu nyonso, ke sobaka ata fyoti ve mutindu ya Yandi ya kusala kima. Yandi lenda soba ve. Nzambi ke salaka nyonso ya kieleka mutindu mosi, na ntangu Yandi—Yandi vwandisaka sysiteme ya Yandi kintwadi.

<sup>40</sup> Mutindu mu tubaka na nkokila yankaka yina, Yandi bakaka lukanu mosi, muntu zolaka kuzwa mpulusu na nzila ya Menga yina basikaka na Muntu yina zabaka dyambu ve. Beto me meka nyonso yankaka, samu na kunata muntu na kuvuuka. Beto mekaka na kunata yandi na kisika beto tungaka mbanza, Nebucadnetsar salaka. Mpe bawu tungaka yinzo ya yinda, Nimrod salaka. Bawu vwandaka na musiku. Mpe bawu vwandaka na batempelo. Bawu vwandaka na mabuundu. Bawu vwandaka na ba-organisation. Bawu vwandaka na basysiteme ya malongi, basysiteme ya denomination, na kumekaka na

kunata bantu na Nzambi. Yawu, konso kitini, kondwaka. Yawu ke kondwaka ntangu nyonso. Yawu ke vutukaka kaka na Menga yina basikaka!

<sup>41</sup> Mutindu ya Nzambi ya kusala kima me tubama na kati ya Ndinga ya Yandi. Mpe Ndinga yayi kele luzayikisu ya muvimba ya Yesu Klisto, kima ve samu na kubwela na Yawu to kukatula na Yawu. “Muntu nyonso yina ke sala yawu,” Biblia ke tuba, “ba ke katula kitini ya yandi na Buku ya Luzingu ya Mwana-dimeme,” kana yandi ke bwela kima to ke katula kima na Yawu. Beno baka kaka Yawu mutindu Yawu kele ya kusonama.

<sup>42</sup> Biblia kele ve na nsatu ya muntu na kutendula Yawu, Nzambi kele mutendudi ya Yandi Mosi. Yandi ke tendulaka Yawu na kusalaka yina Yandi ke tuba kusalama. Yina ke sukisa dyambu. Kana Nzambi tubaka yawu, mpe Yandi salaka yawu, kaka yina. Ya kele na nsatu ya mutendudi ve. Biblia ke tuba, “Ya kele lutendulu ya muntu mosi ve.”

<sup>43</sup> Mutindu ya Nzambi ya kusala yawu! Konso ntangu kele kieleka na kidimbu yina Yandi ke tindaka, Yandi ke landaka na nzila ya ndinga ya Yandi; konso ntangu, tuka yina, Nzambi ke tindaka kidimbu na ntoto. “Ntangu yayi Nzambi ata mbala mosi ve ke salaka kima,” Biblia ke tuba, “tii ntete Yandi ke lakisa yawu na bisadi ya Yandi baprofete.” Ntangu yayi ti, beno. . . Kana ya kele luvunu, na yina nyonso yankaka ya yawu kele luvunu, beno me mona. Yandi ke salaka ata mbala mosi ve kima tii Yandi ke lakisa yawu.

<sup>44</sup> Mpe mumoni yina, profete yina, fwana kutalisama, ti yina yandi pesaka profesu, beto ke tala na Nombres 12:6, ti yina yandi ke tuba ke salama. Na yina, beno kwikila yawu. Kasi kana ya salama ve, na yina beno kwikila yawu ve. Mpe ya fwana vwanda samu na yawu, ya Yandi. . . Ata bambala yandi ke tuba, mpe ya ke salama, mpe nyonso yina; kana ya kele ve landila Ndinga, na yina ya kele dyaka luvunu. Ya fwana vwanda na Ndinga. Ya fwana vwanda na ndonga na Ndinga samu na kidimbu ya ntangu yina, na ntangu yina ba ke na kuzingila.

<sup>45</sup> Ntangu yayi, ba silaka yayi na Nzambi, ti Yandi ke vulusa bantu ya Yandi na diboko ya ngolo. Ntangu yayi, na ntangu ya Ndinga yayi, Yandi bokilaka nganga-Nzambi ve, Yandi bokilaka labi ve, Yandi bokilaka mfumu mosi ve. Yandi bokilaka muvungi, kuna na zulu ya mongo, muntu yina vwandaka tina, profete yina butukaka, soolamaka na ntwala, yina zolaka ve kosalu ya yandi.

<sup>46</sup> Ntangu beno ke kuwa bantu ke zola kuvwanda *yayi, yina*, to *yankaka*, kima mosi, beno tala mbote, Nzambi ke sadilaka bawu ata fyoti ve. Nzambi zolaka landa Moise, samu na kuzwa yandi. Yandi zolaka landa Paul, samu na kuzwa yandi. Yandi. . . Ya kele muntu yina ke zolaka ve kusala yawu, bawu yina zola bima yina ve; na yina Nzambi ke baka muntu yina, yandi yina zola ve kusala, samu Yandi talisa nkembo ya Yandi na nzila ya yandi.

<sup>47</sup> Ntangu yayi beno tala mbote. Konso—konso kidimbu ya kieleka yina Nzambi tindaka kele ya kulanda na ndinga. Ntangu yayi beno tala awa, masonuku kele. . . kidimbu mpe ndinga. “Kana bawu kwikila ve ndinga ya kidimbu ya ntete, na yina bawu ke kwikila na ndinga ya kidimbu ya zole.” Ntangu yayi, kidimbu kele na ndinga. Mpe, ntangu yayi, konso kidimbu ya kieleka yina Nzambi tindaka kele na ndinga, mpe ndinga yina fwana tuba landila Ndinga yina pesamaka samu na kilumbu yina, kaka kieleka.

<sup>48</sup> Kana ndinga kwiza, ndinga mosi ya ntama ya mutindu mosi ntama. . . Beno ke mona kidimbu, na kisika, mpe kidimbu yina muntu ke na kusalaka kele lukolo mosi ya ntama ya mabanza, kuna beno lenda tuba kaka kuna, “Yina me katuka ve na Nzambi,” kana ya ke na kulandilaka na kutalisa lukolo mosi ya ntama ya mabanza. Ata mbala mosi ve ya salaka. Ata mbala mosi ve. Ya ke telemina manaka ya Nzambi.

<sup>49</sup> Ya fwana vwanda kima ya malu-malu. Ya fwana vwanda kima yina bantu ke bakulaka ve. Ya fwana. . . to ba ke fidisa yawu ve. Ya kele ve na nsatu ba fidisa yawu, kana lukolo mosi ya ntama ya théologie. Ya fwana vwanda kima ya mutindu yankaka, kasi ya fwana talisama na kati ya Ndinga, ti ya kele samu na kilumbu yina. Beno me mona, kieleka ya Ndinga ya Nzambi, ya fwana vwanda mutindu yina. Ata kyeta lenda vwanda na yawu. Ya fwana vwanda Kieleka; ya fwana siamisama na Nzambi, Kieleka. Mpe muntu yina ke zonza yawu fwana vwanda ya kusiamisa na Nzambi, samu na kuvwanda mumoni me katuka na Nzambi, to ya kele luvunu; bawu ke—ke mona yawu mpe ve, ata fyoti ve, ke kwikila yawu ve.

<sup>50</sup> Bidimbu kele—kele ya Nzambi. Kidimbu yina ke landa. . . To, ndinga yina ke landa kidimbu fwana vwanda ndinga ya Nzambi ke tuba na nzila ya Ndinga, samu na nsungi yina. Beno me bakula yawu?

<sup>51</sup> Nzambi ke pesaka bidimbu. Samu na yinki Yandi ke salaka yawu? Yandi ke pesaka bidimbu ntangu nionso! Yandi tubaka na bawu ti yawu yina bawu ke sosa na Yandi, bidimbu. Nzambi ke pesaka bidimbu samu na kubenda bukebi ya bantu ya Yandi. Ntangu yayi beto longuka yayi, na mutindu ya kulunga. Beno me mona, bidimbu me pesama samu na kubenda bukebi ya bantu. Samu ti, ntangu kidimbu yina Nzambi me fidisa me pesama, Nzambi me kubama na kuzonza. Nzambi me kubama na kuzonza, ntangu kidimbu me pesama. Kana yawu me katuka na Mazulu, ya me katuka na Nzambi, mpe Nzambi me kubama na kuzonza mpe Yandi ke na kumeka na kubenda bukebi ya bantu.

<sup>52</sup> Mpe Ndinga ke kwizaka na profete ya Yandi. Mpe profete ke talisama na nzila ya kidimbu yina yandi ke talisa, mpe na manima yandi ke kwiza na Ndinga mpe Ndinga me monisama. Yina ke sukisa dyambu; ya ke na nsatu ya ntendulu mosi ve.



Nzambi me tendula yawu yimeni. Beno me mona, ya kele kaka ya kulunga mutindu ya lendaka vwanda.

<sup>53</sup> Ntangu yayi beno tala, Nzambi ke pesaka bidimbu samu na kubenda bukebi ya bantu.

<sup>54</sup> Awa, divunda ya tiya wandaka kidimbu samu na kubenda bukebi ya profete; divunda ya tiya. Moise wandaka, na manima ya ntoto ya kuyuma, wandaka keba mameme ya yandi, muvungi ya mameme ya ntama, ya bamvula makumi nana, na mandefo ya yinda; wandaka tambula kuna, na nzila ya ntama ya mumesanu, ya lendaka vwanda, na suka mosi ya tiya. Mpe na yina, na mbala mosi, kuna me kuma divunda na Tiya, mpe divunda yina vwanda yokama ve. Mbote, yina wandaka nyonso ya mumesanu ve.

<sup>55</sup> Ntangu yayi, Moise na kuvwandaka muntu ya science, na yina, ba longaka yandi na ndwenga nyonso ya ba-Egyptien, mpe ba wandaka bantu ya nene ya science kulutila yina kele na beto bubu yayi; na yawu na kuvwandaka muntu ya science, ya ke talana mutindu yandi zolaka tuba, “Ntangu yayi mu ke kwenda mona wapi mutindu ya ba- . . . ya ba-produit chimique yina me mwangana na zulu ya matiti yina, ti yinti yina ke yokama ve.” Beno me mona, kana yandi belamaka na yawu na mutindu ya science, Yawu zolaka zonza ata mbala mosi ve na yandi.

<sup>56</sup> Mpe mutindu mosi ya kele bubu yayi, ntangu beto ke na kumeka na kubelama na nzila ya lukolo mpe ya ndongosolo, na mutindu ya science, beno ke kondwa Nzambi mafuku ya bakilometele. Beno belama na yawu mutindu Moïse, na basapatu ya yandi ve; ya kulemvuka, ya kukikulumusa.

<sup>57</sup> Mpe, ntangu yayi, ya wandaka na kidimbu samu na kubenda bukebi ya profete. Ntangu yayi, kuna, kidimbu yina zolaka vwanda na ndinga. Mpe na ntangu ndinga yina zonzaka, kana Yawu wandaka Masonuku ve, mu ke kwikila ve ti profete zolaka kuwa yawu. Kasi beno tala mbote mutindu Masonuku ndinga yina wandaka landa kidimbu, ya siamisaka ti ya vwandaka Nzambi, samu Yandi tubaka, “Mu me kuwa kudila ya bantu ya Munu, mpe Mu me bambuka moyo na nsilulu yina Mu salaka na bawu.” Beno me mona, kidimbu, na yawu ndinga ya Masonuku na manima ya kidimbu.

<sup>58</sup> Ntangu yayi ya ke talisa kieleka yina mu me baka kaka lufulu. Ya fwana vwanda kidimbu me katuka na Nzambi, mpe, kana ya kele mutindu yina, ya kele na ndinga ya Masonuku na manima ya yawu, samu na nsilulu ya kilumbu yina. Ya kele ve lukolo mosi ya ntama; ba-rabbin mpe nyonso yina wandaka luta na balukolo, to nyonso, nzila nyonso, nzila nyonso, banganga-nzambi, mpe nyonso yankaka. Kasi yayi kele kima ya malu-malu, mpe ya kele Masonuku, ya kele nsilulu; mpe kidimbu samu na kubenda bukebi ya profete.

59 Mpe na yina, Yandi tubaka awa, ntete yandi kwenda kuna, yandi fwana vwanda na kima na kusiamisa ti yandi kele profete, beno me mona, na ntwala bawu yamba yandi. Yandi tubaka, “Ba ke ndima ve ti Mfumumu me monika na munu.”

60 Yandi tubaka, “Na yawu, Mu ke pesa nge bidimbu zole ya kusala, mpe yina ke benda bukebi ya bantu. Mpe na ntangu bukebi ya bantu me bendama, kuna zonza bampova yayi na bawu, ‘Mu kele Nzambi ya Abraham, Isaac mpe Jacob, mpe Mu me bambuka moyo na nsilulu ya Munu.’ Mpe Mu me fidisa nge samu na kuvulusa bawu, mpe Mu ke vwanda na nge.”

61 Beno talaka kidimbu ya yandi ya ntete? Yandi kuzwaka mitindu nyonso ya bilanda-landa ya yawu. Muntu nyonso mekaka na kulosa nyoka. Ya kele . . . Kana yina kele ve mutindu ya bantu, mu zaba ve yinki ya kele, beno me mona. Beno me mona? Kasi wapi mutindu ya ndinga bawu kuzwaka na manima ya yawu? Kima ve; ndinga ya Egypte ya yinza. Kasi bawu lendaka na kusala kidimbu, kasi bawu vwandaka na ndinga ve na manima ya yawu, samu na kusimbisa yawu. Kasi Moise vwandaka na MUTINDU ME TUBA MFUMU. Yina vwandaka luswaswanu. Na nsuka bantu ya bilanda-landa landilaka ntangu ya yinda, kasi na nsuka ya salaka ntangu ya yawu.

62 Beno zaba ti Biblia ke tuba ti ya ke salama dyaka na bilumbu ya nsuka? “Mutindu Jannès na Jambres kuteleminaka Moise, mutindu mosi muntu ya dibanza ya kubela ke manga yina me tala Kieleka.” Nani kele Kieleka? Yesu Klisto kele Kieleka. Beno me mona? “Dibanza ya kubela na ntwala ya Kieleka.”

63 Ntangu yayi Yehowa ke zonzila na nzila ya Ndinga ya Yandi ya nsilulu. Na yina Yandi fwana kubika profete yayi na ntwala ya kufidisa yandi. Samu ti, ya kele ntangu nyonso na nzila ya dibanza ya Yandi, nzila ya Yandi ya kusala, konso ntangu ke tinda profete ya Yandi na Ndinga, mpe ke siamisa profete.

64 Dyaka, yayi kele kidimbu ya nsilulu. Profete, yandi mosi, kele kidimbu. Biblia me tuba mutindu yina. Ntangu beno ke mona bantangu kuluta, mpe na manima beno mona kukwiza . . . Beno baka disolo ya Biblia, beno longuka yawu. Ntangu nyonso beno ke mona ntangu ya yinda kuluta; kasi kaka na ntangu beno ke mona profete kumonika, ya vwandaka kidimbu ya lufundusu. Nzambi zolaka fundisa yinza, na ntangu Yandi . . . to yinsi, to bantu, ntangu beno monaka profete kukwiza. Mu longaka dilongi mosi na zulu ya yawu, beno bantu ya ba-bande beno ke bambuka moyo, . . . *Kidimbu Ya Kieleka Ba Me Kondwa Kutala*. Bawu ntangu nyonso ke kondwaka kutala yawu, bawu ntangu nyonso fwana, kasi ya vwandaka kidimbu ya lufundusu ke kwisa.

65 Ntangu yayi Ndinga ya Yandi me lungisama na ndinga ya Yandi. Yina Yandi silaka, na yawu Yandi me lungisa Ndinga ya Yandi na nzila ya ndinga.

66 Nkwizulu ya profete kele kidimbu yina ke kebisa ti lufundusu me kuma pene-pene. Ya ke vwandaka ntangu nyonso. Beno bika mu tangila beno kaka mosi.

67 Beno tala Noé yina ke telama na nsuka, na—na bilumbu yinza fulukaka na maza, profete pesaka profesu. Yinki ya vwandaka? Lufundusu bulaka mbala mosi na manima.

68 Moise kwendaka na Egypte, profete yina me siamisama na bidimbu ya profete. Yinki salamaka? Lufundusu bulaka Égypte kaka na manima.

69 Elie kotaka na kisalu, profete, mpe pesaka profesu na Achab mpe yinsi yina. Yinki salamaka? Lufundusu bulaka yawu kaka na manima. Kieleka.

70 Jean Baptiste kwizaka, mutindu kidimbu. Yandi vwandaka profete. Yandi vwandaka profete-kidimbu yina kwizaka na zulu ya ntoto. Bawu zabaka, ntangu yandi ke kwiza, Mesiya ke zonga, na manima ya yandi. Ya zolaka vwanda, samu, na kuzwa—na kuzwa musolami.

71 Samu na yinki yayi kele, samu na kuzwa bantu ya kusolama bayina ke basika, mutindu na bilumbu ya Noé. Mutindu na bilumbu ya—ya Elie, mafunda sambwadi to bankama sambwadi, to nyonso yina ya vwandaka, bayina fukamaka ve, samu na kubokila bawu na kubasika. Jean bokilaka misolami na kubasika, mpe pesaka bawu na Klisto ntangu Yandi kwizaka, pesaka dibuundu ya yandi, na tubaka, “Mu ke kulumuka, Yandi ke mata, samu,” yandi tubaka, “Mu ke kaka ndinga ya Yandi, ke boka na ntoto ya kuyuma, ‘sungika nzila ya Mfumu.’” Mpe Yesu kwizaka mutindu mosi. Kubikaka bantu yina ba soolamaka na kuwa ndinga ya Nzambi, beno tala yina kele kidimbu ya profesu. Oh, kana beno landa Bansangu yayi, beno kuzwa ya nte- . . . beno kubika bantu ya kusolama. Bayankaka ve, bawu ke kuwa yawu ata fyoti ve. Ya kele misolami ba ke bokila.

72 Wapi kisika Wanzio yina kwizaka, na Sodome, yina salaka kidimbu yina? Na Abraham mpe nkonga ya yandi. “Beno vwanda ntama na Sodome; ya ke yokama na tiya!” Beno me mona? Yesu silaka yawu na kuvutukila, beno zaba, dyaka, na Sodome yayi. Beno tala ntangu yayi.

73 Yinki ya ke sala? Ya ke kubika misolami samu na kiswamunu ya Nzambi, mutindu na ntangu ya Noé, mpe nyonso yina.

74 Mpe yinki ya ke sala? Ya ke fundisa muntu ya kukondwa lukwikilu ya mayele, na lufundusu. Ya ke vwandaka ntangu nyonso. Kumanga kyadi, kima ve me bikana kasi lufundusu. Na yawu ya ke kuzwa muntu ya mayele mpe muntu ya kukondwa lukwikilu na kukubama na lufundusu. Samu, yinki bawu ke sala? Bawu ke fundisa yawu.

75 Ya kele samu na yina ba-Juif kudyaka minsuni ya bawu mosi. Ya kele samu na yina menga basikaka na mbanza ntangu

Titus, mfumu ya nene ya basoda ya Rome, kotaka kuna, ya kele samu ti bawu mangaka Mpeve-Santu. Lufundusu zolaka kwiza samu ti bawu vwandaka seka Yawu. Yesu tubaka na bawu, ntangu bawu bokilaka Yandi Béelzébul, ti Yandi tubaka, “Mu ke lemvokila beno,” mulemvo ya masumu kusalamaka ntete ve, “kasi,” Yandi tubaka, “ntangu Mpeve-Santu ke kwiza sala kima mutindu mosi, kuzonza yimbi samu na kutelemina Yawu ke kuzwa mulemvo ata fyoti ve.” Mpe ba lemvokilaka ata fioti ve nsungi yina samu na yawu. Ya kele kieleka.

<sup>76</sup> Lufundusu samu na muntu ya kukondwa lukwikilu! Ya me tulama kuna samu na lukanu yina, samu na kupesa nsemo na mukwikidi, mpe mpimpa na muntu ya kukondwa lukwikilu. Kaka mutindu Dikunzi ya Tiya vwandaka; Yawu vwandaka sala nsemo, samu na kuzabuka na yinsi ya nsilulu, mpe mpimpa na bayina kwikilaka ve. Bidimbu ya Nzambi ke salaka yawu ntangu nyonso, ke basisaka meso ya muntu ya kukondwa lukwikilu, mpe pesaka kumona mpe nsemo na kutambula na mukwikidi. Ya kele samu na yina Yawu me tindama.

<sup>77</sup> Kana profesi ya yandi kele kieleka, kana profesi ya profete kele kieleka mpe yawu kusalama, kuna ya kele dikebi ya Nzambi. Ntangu yayi na Nombres 12:6, beto ke tala kima mutindu mosi, na Masonuku.

<sup>78</sup> Biblia sonamaka na bantu yayi. Ntangu yayi kana beto tanga na ya Zole ya Pierre 1:21, Ya me tuba, “Bantu ya ntama, kutwadisamaka na Mpeve-Santu, na kusonika Biblia.”

<sup>79</sup> Mpe na Hébreux 1:1, kisika beto zonzilaka nkokila yankaka yina, “Nzambi, na bambala mingi mpe na mitindu mingi zonzaka na batata na nzila ya bapofete, na bilumbu ya nsuka yayi na nzila ya Yesu Klisto, Mwana ya Yandi.”

<sup>80</sup> Dikunzi ya Tiya, kidimbu; ndinga . . . to ndinga zolaka zonza. Dikunzi ya Tiya na divunda, vwandaka ndinga ya makelele yina Nzambi vwandaka kubika na kuzonzila.

<sup>81</sup> Beno tala mbote ntangu yayi, beno kondwa yayi ve. Ntangu Miryam sekaka mpangi ya yandi ya bakala, Moise, mpe yandi vwandaka profete ya kento ntangu yandi sekaka yandi, mpe Nzambi kulumukaka na Dikunzi ya Tiya yina, Moise zabaka ti Nzambi vwandaka ya kukubama na kuzonza. Ya vwandaka kidimbu. Mpe ndinga yina landaka yawu, tubaka, “Nge ke banga Nzambi ve?” Yandi tubaka, “Ya kele na muntu ve na yinsi mutindu kisadi ya Munu, Moise.”

<sup>82</sup> Salaka mutindu mosi ntangu bawu telamaka mpe tubaka ya kele . . . Ntangu Dathan telamaka, mpe ntangu Koré, kwendaka na ntwala ya yandi, “Ya kele na bantu ya kulutila santu na nge. Nge ke banza ti nge kele kaka mosi yina kele na kati ya nkonga.” Nzambi tumaka Moise na kusalu yina!

<sup>83</sup> Mpe na ntangu bawu zolaka kuzwa nkonga yankaka na kukwenda na bawu, kusalaka bawu mosi organisation, Yandi

tubaka, “Kabuka na bawu. Mu ke bedisa kaka bawu. Mu ke yoka kaka bawu,” mpe Yandi salaka yawu. Yinza kuzwaka bawu.

<sup>84</sup> Ntangu yayi beto ke mona ti yina ke vwandaka ntangu nyonso mutindu ya Nzambi. Dikunzi ya Tiya ke lakisa Ndinga ke na kukubama na kuzola. Oh, Texas, wapi mutindu beno lenda vwanda ya kufwa meso? Beno ke bambuka dyaka moyo na Houston. Ntangu yayi ya kele na Ndinga ke landa kidimbu.

<sup>85</sup> Moise, kidimbu profete na Israel, silaka ti Ndinga me kubama na kupesa kimbangi.

<sup>86</sup> Mutindu Ndinga ya Nzambi kele ya kulunga, na nzila, konso ntangu! Kaka mutindu Urim Thummim, mutindu mu vwandaka zonzila, nkokila yankaka yina. Urim Thummim vwandaka kuna, mpe kana ti kidimbu yango kukwiza na Urim Thummim yina, ba vwandaka ndima ndinga ve. Ya fwana vwanda na kidimbu. Kidimbu ke siamisaka ndinga. Mpe ndinga ke siamisaka kidimbu, ti yawu me katuka na Nzambi. Ndinga ya kidimbu kele yina ke zonza “yinga” to “ve.” Kana Nzambi mangaka yawu, na yawu Ndinga ke zonza “ve.” Kana kidimbu vwandaka kuna, Nzambi zonzaka “yinga.” Ntumunu ya Nzambi me sobaka ata fyoti ve. Beto lendaka vwanda bangunga na zulu ya yawu, kasi yawu me sobaka ata fyoti ve.

<sup>87</sup> Beno tala, Jonas profete, beno tala kidimbu yina. Yandi vwandaka na nzila ya yandi na Tarsis. Yandi bandaka na kukwenda na Ninive, mpe bakaka nzila na Tarsis. Mingi ke fundisaka Jonas. Jonas zolaka vwanda ve ya kufundisa. Yandi vwandaka profete. “Makulu ya muntu ya kudedama kele ya kutumama na Mfumu,” mpe yandi bandaka na nzila ya yandi na Tarsis. Mpe beto ke meka na kufundisa muntu, kasi Yesu salaka yawu ve.

<sup>88</sup> Beno tala, Yandi tubaka, “Mutindu Jonas vwandaka na kivumu ya baleine, bilumbu tatu mpe bampimpa tatu,” ya zolaka vwanda kidimbu, “mutindu mosi Mwana ya muntu fwana vwanda na kati ya ntoto, bilumbu tatu mpe bampimpa tatu. Mpe nsungi ya yimbi mpe ya kindumba ke sosa kidimbu, mpe ya ke vwanda ve na kidimbu yina ba ke pesa bawu na Nzambi, beno bambuka moyo, kasi kidimbu ya Jonas.” Yinki kele kidimbu ya Jonas? Mvumbukulu. Mpe yayi kele nsungi yango ya Sodome, ya kindumba, kindumba ya kimpeve, ku- . . . ke sala kindumba ya kimpeve na kuteleminaka Kieleka ya Nzambi, na kusekaka Yawu. “Nsungi ya yimbi mpe ya kindumba ke sosa kidimbu, mpe bawu ke kuzwa yawu, ya ke vwanda kidimbu ya mvumbukulu.” Beno tala, Jonas . . .

<sup>89</sup> Bantu yina vwandaka mimpani, mpe ya vwandaka ya nene . . . Ya vwandaka mbanza ya mumbungu. Industrie ya nene vwandaka bambisi. Bawu vwandaka fidisa mbisi bisika nyonso na yinsi. Bantu vwandaka bilobi-mbisi. Yina vwandaka ksalu

kuna. Mpe bawu vwandaka mimpani, bawu vwandaka sambila bibulu mpe biteki, mpe kumaka bantu ya yimbi mingi.

<sup>90</sup> Mutindu yinsi yayi ntangu yayi, ya kufuluka na sexe mpe Hollywood, mpe mitindu nyonso, mpe dyaka na kati ya mabuundu. Mpe beno tala yina ke salamaka. Mbote, bantangu yankaka mpe sex-appeal na dibuundu kele ya kubokila mambu ya bilumbu yayi. Wapi mutindu yinsi yayi lendaka telama na yisi ya kima ya mutindu yina? Beno ke bokila beno mosi Miklisto, mpe beno ke sala bima ya mutindu yina, wapi mutindu ya lendaka telama?

<sup>91</sup> Mutindu nkundi ya munu ya mbote, Jack Moore, tubaka, bamvula me luta, “Kana Nzambi bika yinsi yayi kuluta na yayi, Yandi ke vwanda ya kukwika, mutindu Nzambi ya kieleka, na kuvumbula Sodome na Gomorrhe, mpe kulomba na bawu lemvo na kuyokaka bawu na tiya.”

<sup>92</sup> Beno kele ya kukangama na lufundusu. Ya kele ve na mutindu yankaka ya kundima yawu. Beno sonika yawu na Babiblia ya beno. Mu ke na kukumaka kiboba ya bakala. Beno mona kana ya ke kwenda ve na lufundusu. Kana mu zinga luzingu ya mbote, mu ke mona yawu, na ntangu ya mbote. Bamvula fyoti dyaka mpe ya ke salama.

<sup>93</sup> Jonas. Bawu nyonso vwandaka kuna na kuloba, pene ya midi, mpe awa me kwiza nzambi ya mubu, kuna, baleine, me belama na simu mpe me luka profete na simu. Wapi kidimbu!

<sup>94</sup> Nzambi vulusaka profete ya Yandi, na nsangu. Ntangu yayi bawu monaka kidimbu, bawu kwikilaka kidimbu, ntangu yayi yinki kele nsangu? “Beno balula ntima!” Yina kele ndinga ya kidimbu. Ndinga ya kidimbu kele, “Beno balula ntima, to na bilumbu makumi yiya beno ke yokama.” Bawu zabaka mingi samu na kubalula ntima.

<sup>95</sup> Yesu tubaka, “Bawu ke fundisa nsungi yayi, samu ti bawu balulaka ntima na malongi ya Jonas; ya kulutila nene na Jonas kele awa.”

<sup>96</sup> Ndinga vwandaka, “Beno balula ntima, to na bilumbu makumi yiya beno ke yokama.”

<sup>97</sup> Jean profete, talanaka, kidimbu ya kutalana ya profete, na manima ya bamvula nkama yiya na profete ve. Bawu vwandaka na maye ya nyonso. Mu ke banza kaka na wapi mvindu bawu vwandaka! Bankama yiya ya bamvula, kukondwa profete, kasi ntangu vwandaka me belama ti Mesiya zolaka kwiza. Ntangu yayi, Jean vwandaka kidimbu, na kuvwandaka profete, ti Mesiya vwandaka ya kukubama na kuzonza, ndinga ya kidimbu; samu ti, na Malachie 3, beto ke tala, “Mu ke fidisa munati-nsangu ya Munu na ntwala ya kizizi ya Munu.” Elie zolaka kwiza na ntwala ya kizizi ya Yandi, mpe Elie kwizaka. Jean, na kimpeve mpe ngolo ya Elie, kwizaka mpe salaka kieleka yina Masonuku salaka, mpe bawu bakulaka yawu ve. Masonuku

me tuba mutindu yina. Yandi vwandaka kidimbu, kidimbu ya profete, ti Mesiya zolaka zonza.

<sup>98</sup> Profete yina, na kuzabaka yawu mbote-mbote, tii yandi tubaka, “Kasi, ya kele na Muntu ya kutelama na kati-kati ya beno, kaka ntangu yayi. Mesiya yina mu ke na kuzonzila, kele na kati-kati ya beno. Mu kele ve ya kulunga na kuzibula basapatu ya Yandi. Yandi kele Yandi yina ke botika na Mpeve-Santu mpe na Tiya. Mu ke na kubotika na maza, na kubalula ntima, kasi Yandi ke vwanda na manima ya munu. Yandi kele na kati-kati ya beno ntangu yayi.”

<sup>99</sup> Kilumbu mosi yandi monaka Bakala mosi ya ntwenya vwanda kwiza, vwandaka tambula. Yandi monaka Dikunzi ya Tiya yina, na mutindu ya Yembe, yina katukaka na Mazulu; Ndinga mosi, tubaka, “Yayi kele Mwana ya Munu ya luzolo, na Yandi yina Mu me sepela na kuzinga.” Yandi tubaka, “Yandi yina mu me sepela na kuzinga,” ya kele kaka verbe na ntwala ya adverb, na yawu ya kele kaka mutindu mosi. “Na Yandi Mu me sepela na kuzinga,” to, “na Yandi yina Mu me sepela na kuzinga,” ya ke sala luswaswanu mosi ve. Beno tala, “Mu me sepela na kuzinga na kati ya Yandi.”

<sup>100</sup> Jean tubaka, “Mu ke pesa kimbangi yina Yandi yina tubaka na munu na ntoto ya kuyuma,” na seminere ve, “na ntoto ya kuyuma, tubaka, ‘Na zulu ya Yandi yina nge ke mona Mpeve kukulumuka, mpe kuvwanda na zulu,’ amen, ‘Yandi kele Yandi yina ke botika na Mpeve-Santu mpe na Tiya.’ Mpe mu ke pesa kimbangi ti ya kele Kieleka.”

<sup>101</sup> Yinki ya vwandaka? Profete yina vwandaka kidimbu ti Mesiya vwandaka me kubama na kuzonza.

<sup>102</sup> Yinki vwandaka Mesiya? Mesiya vwandaka Ndinga, ya muvimba. Yandi vwandaka muvimba ya Nzambi. Baprofete vwandaka mwa Nsemo ya fyoti. Kasi na kati ya Yandi vwandaka Nsemo yina nyonso, vwandaka na Mesiya yayi, samu ti Yandi vwandaka Nzambi me monisama, yina kumaka Emmanuel, Nzambi na kati-kati ya beto na nzutu ya muntu.

<sup>103</sup> Mesiya vwandaka ya kukubama na kuzonza. Mpe beno tala, Biblia me tuba, ti, “Ndinga ya Mfumu ke kwizaka na profete.”

<sup>104</sup> Ntangu yayi awa me telama Jean, yina Yesu tubaka vwandaka “profete ya kulutila nene yina me zingaka ntete ve.” Yesu tubaka mutindu yina, na Matthieu kapu 11, “Yinki beno kwendaka mona, muntu ke ningana na konso mupepe, denomination *yayi* ke tuba, ‘Mu ke pesa beno ya kulutila; beno sala *yayi*’? Jean ve! Ve, ve. Muntu yina ba lenda ningisa, ya matalana? Ve, yandi vwandaka profete ya ngolo, yina vwandaka pete ve. Beno kwendaka mona muntu yina vwandaka nyonso ya kulwata bilele ya kinganga-Nzambi?” Mpe Yandi tubaka, “Ve, ba ke vwandaka na bayinzo ya bantinu. Ba ke kwela bantwenya, ke pesa beze na ba-bébé, mpe ke zika biboba. Ya

kele mutindu. Bawu zaba kima ve na yina me tala Mbele ya meno zole. Na yawu yinki beno kwendaka mona, profete?” Yandi tubaka, “Kulutila profete!” Ya kieleka, yandi vwandaka munatinsangu ya Ngwisani, yina vwandaka nsilulu Nzambi silaka na kutinda yandi.

<sup>105</sup> Mpe beno tala awa, Jean ya kutelama na kati ya maza, na kubotikaka, vwandaka tuba, “Yandi ke na kwiza.”

<sup>106</sup> Mpe awa kele Ndinga, dyaka ve na Mazulu, kasi kumaka nsuni. Ndinga kele nsuni, yinki yawu ke salama na ntangu yina? Yinki kele ntumunu ya Masonuku ya Nzambi? Ndinga kwizaka na profete, mbala mosi na ntoto ya kuyuma, mbala mosi na ndonga ya nene ya maza. Ndinga kwizaka na profete.

<sup>107</sup> Jean talaka na zulu, mpe yandi tubaka, “Mu ke na nsatu ya kubotama na Nge.”

<sup>108</sup> Mpe mpangi ya munu ya bakala ya luzolo, ya ntama, Docteur Davis, ya dibuundu ya ba-Missionaire Baptiste, yina botikaka munu na lukwikilu ya Muklisto, kana yandi kele awa na nkokila yayi, mu zola kunyongisa ve bansatu ya yandi. Samu ti, yandi ke zingaka awa na Texas, yandi kele awa na Myongo ya Davis. Kasi mu ke bambuka moyo ti beto swanaka na yawu kilumbu mosi, mpe mu vwandaka kaka mwa mwana ya bakala. Mpe mu tubaka, “Ya ke na kuwakana mbote ve, Docteur Davis.”

<sup>109</sup> Yandi tubaka, “Yina salamaka, ti kuna Yesu botikaka Jean, mpe na manima Jean botikaka Yesu, samu ti Jean vwandaka ve ya kubotika.” Ya monanaka ve ya kulunga na munu.

<sup>110</sup> Mu landilaka kaka na kuingila, na kutalaka mbote, na kukiyufulaka. Mu zolaka tuba kima mosi ve na zulu ya yawu, kasi kilumbu mosi ntangu Mfumu monikisaka yawu.

<sup>111</sup> Ntangu yayi beno tala mbote yina Yesu tubaka. Jean tubaka, “Mu ke na nsatu ya kubotama na Nge, mpe samu na yinki Nge ke kwiza na munu?”

<sup>112</sup> Yesu tubaka, “Bika ti ya vwanda mutindu yina, samu ti ya kele ya kulunga samu na beto na kulungisa ludedomo nyonso.”

<sup>113</sup> Jean zabaka Nani Yandi vwandaka. Kuna vwandaka bantwadisi zole ya yinza, bantwadisi zole ya dibuundu, Nzambi na profete ya Yandi, ya kutelama kintwadi. Ntangu yayi, beno tala mbote, bawu zolaka zaba.

<sup>114</sup> Yesu tubaka, “Bika ti ya vwanda mutindu yina, ya kele kieleka, kasi mutindu ya me kuma na beto ti beto lungisa ludedomo nyonso, Ndinga ya nsilulu.”

<sup>115</sup> Munkayulu zolaka vwanda ya kusukula ntete ba monisa yawu. Jean botikaka Yesu samu ti Yandi vwandaka Munkayulu. Beno me mona? Munkayulu zolaka vwanda ya kusukula ntete ba monisa yawu. Yandi kwendaka kuna, mpe Munkayulu kusukulamaka, mpe na manima ba monisaka Yandi na mutindu



ya kulunga. Yandi tubaka, “Yina kele Mwana-dimeme ya Nzambi.”

<sup>116</sup> Yandi mataka na simu, mpe awa Mpeve ya Nzambi kulumukaka na zulu ya Yandi, tubaka, “Yayi kele Mwana ya Munu ya luzolo.” Beno me mona, kuna ba monisaka Yandi na bantu. Kasi ntete ba monisa Munkayulu, ya zolaka vwanda ya kusukula ntete; yina kele musiku ya Ngwisani ya Ntama. Mbote mingi.

<sup>117</sup> Mesiya vwandaka kubama na kuzonza, samu ti awa vwandaka kidimbu ya profete. Mpe na ntangu bawu monaka profete yina kukota na kisalu, na manima ya bamvula nkama yiya nyonso yina kukondwa mosi, bawu zabaka, ndinga yina vwandaka landa vwandaka Mesiya.

<sup>118</sup> Ntangu yayi beno mitangi ya Biblia beno banza ngolo na baminuti fyoti. Na kutalaka mbote na nkadulu ya yandi, wapi mutindu bawu kondwaka yandi? Wapi mutindu bawu kondwaka na kuzaba ti ya vwandaka yandi, Jean? Nkadulu ya yandi vwandaka talisa, mpeve ya yandi mpe nkadulu ya yandi vwandaka talisa na kuvwanda Elie. Ntangu yayi beno tala wapi mpeve ya kele. Ntangu yayi, yandi vwandaka Jean-Baptiste, kasi mpeve ya Elie yina vwandaka na zulu ya yandi.

<sup>119</sup> Beno tala, na ntete, Elie vwandaka muntu yina vwandaka zola mfinda. Beno me mona? Mpe Jean vwandaka muntu na ntoto ya kuyuma.

<sup>120</sup> Mpe Elie vwandaka muntu yina bedisaka systeme yina ya organisation, na kilumbu yina, na nyonso yina vwandaka na yandi. Mutindu mosi salaka Jean, “Beno nsungi ya banyoka. Nani me longa beno na kukima nganzi? Beno banda ve na kutuba, ‘Mu kele na *yayi, yina, to yankaka.*’ Nzambi kele na lenda na matadi yayi na kubasisa bana samu na Abraham.” Beno me mona bankadulu nyonso zole?

<sup>121</sup> Mpe beno tala Elie, yandi fundisaka ba-Jézabel nyonso yayi bayina pakulaka bizizi na kilumbu ya yandi, bakento yina ya kukondwa buzitu. Yinki Jean salaka? Kima mutindu mosi, na Hérode. Bawu nyonso zole, yina vwandaka dyambu ya lufwa ya bawu.

<sup>122</sup> Beno tala Elie, na manima yandi salaka kisalu yina ya nene, yandi kumaka na mawa, yandi lalaka kuna mpe sambilaka Nzambi na kubaka yandi. Jean salaka mutindu mosi, mpe lalaka kuna mpe fidisaka bilandi ya yandi, yandi tubaka, “Beno kwenda yufula Yandi. Yandi kele Yandi yina to beto vingila yankaka?” Yesu zabaka yawu.

<sup>123</sup> Yandi vwandaka Elie. Yina zolaka vwanda nkadulu ya yandi. Yandi talisamaka kieleka mutindu Elie vwandaka. Yandi vwandaka na mpeve ya Elie.

124 Ya ke kwiza bambala tanu, mpeve yango kele, samu na kusadila yawu: Elie, Elisée, Jean, Malachie 4, mpe dyaka samu na ba-Juif. Bilumbu ya nsuka, beto kele na kati na nkokila yayi, mpeve ya Elie. Beno tala ntangu yayi.

125 Bubuyayi, mu zola ti beno tala baprofete ya beto ya bilumbu yayi Achab bubuyayi, na kubikaka ba-Jézabel ya bawu kuzenga bansuki ya bawu, kupakula kizizi ya bawu, kulwata bakupe, kunwa tabaka, nyonso, “Ya kele mbote.” Baprofete ya beto—ya beto ya Achab bubuyayi, ke landa mutindu ya balukolo ya bawu, kieleka, na kutwadisaka bawu na ba-credo yina bantu me sala mpe ba-denomination. Yinki ya kele? Baprofete Achab.

126 Beto ke na nsatu ya Michée yankaka na kukota na kisalu. To na ntangu ya Achab, Elie kotaka na kisalu. Yandi yina, silamaka.

127 Bawu ke twadisa bantu, na mutindu nyonso bawu zolaka kukwenda. Kana bawu sala yawu ve, bawu talisa bawu mpasi awa kisika mosi kuna, bawu ke kwenda mpe ke kota na *yayi* mpe ke landila kaka na kutuba ti bawu—bawu—bawu kele Miklisto.

128 Mbote, ata mbala mosi ve ti bawu kuzwaka mpulusu, na mbandukulu. Nkadulu ya bawu ya kieleka ke monisa yawu. Beno lenda kuzwa bambuma ya vinu na yinti ya bansende? Beno lenda kuzwa ba-pasthèque na vinu citrouille? Nkadulu ya kieleka ke lakisa ti bawu zola kima ve ya kusala na Ndinga. Bawu ke seka Yawu, mpe ke vweza Yawu. Na ntangu ba me sonika, “MUTINDU ME TUBA MFUMU, bima yayi ke salama,” mpe ba vwanda seka Yawu, vwanda vweza Yawu.

129 Kuyituka ve ti Yesu tubaka, “Ntinu-kento ya Sude ke vumbuka na nsungi yayi, na bilumbu ya nsuka, mpe ke fundisa yawu; samu ti yandi katukaka na bansuka ya ntoto, samu na kumona muntu na dikabu ya ndwenga.” Yandi tubaka, “Ya kulutila nene na Salomon kele awa.” Kieleka. Salomon vwandaka, kilumbu ya yandi, vwandaka mosi ya bilumbu ya nene. Bantu nyonso kwikilaka dikabu yayi yina Nzambi pesaka bawu, Salomon yayi, mpe kuzabana ya yandi—ya yandi kwendaka bisika nyonso. Yinki kana beto bantu ya kilumbu yayi. . .

130 Mpe beto ba-Américain, beto ntangu nyonso ke mekaka na kuzwa manaka ya kutelemina communisme. *Yawu yayi* manaka ya Nzambi, “Beno balula ntima! Beno baluka na Nzambi!” Manaka mosi? Kana ba lendaka kaka kusala na Yawu, beto ke zimbana communisme.

131 Ntangu Israel nyonso kwikilaka dikabu yina Nzambi pesaka bawu. Kana Amerika ke pesa kaka. . . ke kwikila dikabu yina Nzambi me pesa beto, na bilumbu yayi ya nsuka, Mwana ya Yandi, na mutindu ya Mpeve-Santu, yina vumbukaka na lufwa, ke na kuzingaka na kati-kati ya beto landila nsilulu ya Yandi. Kana beto ke vwanda kaka ya kukangama na Yawu!

132 Ya ke kwenda kaka na Musolami. “Samu ti muntu ve lenda kwiza na Munu kana Tata ya Munu kubenda yandi. Mpe bayina nyonso Tata me pesa Munu, bawu ke kwiza.” Kaka kukuna nkuna; ya ke kubwa, ndambu lweka *yayi* mpe yankaka lweka *yina*, kasi ya kele na kukuna ya nkuna, na mutindu nyonso. Ya ke simba bansimbulu ya yawu kisika nyonso ya kele. Ba ke simba yawu.

133 Beno tala, awa bawu vwandaka, mpe beto talaka ti na kilumbu yina, Achab, yinsi nataka bawu bantu ya Israel, na kusala mutindu nyonso ya bima yina bawu zolaka kusala, mpe dyaka kulandila na kutubaka ti bawu kele bantu ya Israël.

134 Mutindu Elie bedisaka nsungi yina, na nyonso yina vwandaka na kati ya yandi, mpe Nzambi siamisaka yandi. Mpe yandi vwandaka profete.

135 Kaka ntete nkwizulu, mutindu Jean salaka! Yandi kwendaka kuna na Israel. . . Ba kwelisaka kento yayi na—na Hero- . . . to na Herode, kento ya mpangi ya yandi ya bakala Philippe. Yandi kwendaka mbala mosi na ntwala ya yandi; yandi soolaka ve bampova ya kuzonza. Yandi vwandaka na boma ve ti nganga-Nzambi mosi ke tula yandi na ngaanda. Yandi vwandaka na ata kalati ya kimpangi; kaka na Nzambi. Yandi vwandaka profete ya Yandi. Ndinga vwandaka na yandi. Yandi zolaka kwenda ve kuyufula évêque mosi to ba-diacre. Yandi vwandaka ya kupakulama. Yandi vwandaka na Ndinga. Yandi kwendaka mbala mosi na ntwala ya yandi, mpe tubaka, “Ya kele ve ya kulunga na nge na kubaka yandi!” Kieleka. Yandi bongisaka ve bampova ya yandi ya kuzonza, na muntu mosi.

Bakento ya yimbi yina vwandaka sala kindumba, vwandaka landila!

136 Mutindu Amos, ntangu yandi kotaka na kisalu, yandi talaka kuna. Beto me zaba ve kisika yandi katukaka. Oh, mutindu yandi zolaka tala mbanza yina ya Samarie! Mutindu bizieti talaka, nyonso ya kitoko, mpe balongi nyonso na ngwisani na bayinsi, mpe na kiwisa na bayinsi mpe bantu nyonso, mpe dyaka vwandaka zinga na disumu! Meso ya yandi kumaka fyoti, yintu ya yandi ya dibandi vwandaka lezima, mpe na yina yandi kulumukaka. Yandi vwandaka ve . . . yandi vwandaka ve na mingi ya kutala, kasi yandi vwandaka na MUTINDU ME TUBA MFUMU.

137 Beto ke na nsatu ya Amos na kisalu bubu yayi. Beto ke ndima yandi? Ya kieleka ve, kulutila ve yina yandi salaka. Kana yandi kota na kisalu, yandi ke bebisa konso organisation, konso denomination, kento nyonso yina ke lwataka bakupe, Jézabel nyonso yina ke zengaka bansuki. Yandi ke panza bawu bitini-bitini. Ba ke basisa yandi na bala-bala, mpe kutuba, “Kiboba yina ya fanatiki!” Kasi yandi ke vwanda na MUTINDU ME

TUBA MFUMU, samu ti ya kele kaka ya kusonama mutindu yina. Denomination ke ndima yandi? Ve.

<sup>138</sup> Yandi vwandaka ve na muntu mosi samu na kusimbisa manaka ya yandi. Mbanza yayi ya nene, ya kitoko ya—ya kulula, mutindu Samarie vwandaka, ba ke ndima mwa muntu yayi ya kuzabana ve mpe ya kukondwa kalati ya kimpangi, na muntu mosi ve ke simbisa yandi, to kima mosi? Yandi vwandaka ve na mutindu mosi ya kusimbisa. Yandi vwandaka ve na kalati mosi ya kimpangi, yandi basikaka na ata lukolo. Kasi yandi vwandaka na MUTINDU ME TUBA MFUMU. Mpe nkwezulu ya yandi, mutindu profete, vwandaka kidimbu. Ndinga ya Yandi katukaka na Nzambi, mpe yawu talisamaka na bilumbu ya Jéroboam ya Zole. Nyonso yina yandi tubaka salamaka.

<sup>139</sup> Ntangu yayi beto ke tala, kilumbu yayi yina beto ke na kuzingila, ya kele kaka kuvutukila ya yawu dyaka. Balongi mpe bantu, ke na nsoni ya kubaka ntelamanu na chaire, mpe Nsangu ya mbote me kuma mutindu ya kuzwa dimpa samu na bawu. Ba kele na boma ya kutuba kima mosi, samu ti muntu mosi ke basisa bawu na *yayi*, na *yina*, to na *yankaka*.

<sup>140</sup> Ya kele kaka na Muntu mosi yina lenda basisa beno na Mazulu, ya kele Nzambi. Mpe wapi mutindu ba ke tula beno na ngaanda ya Mazulu, na kukangamaka na Ndinga ya Yandi? Ya kele samu na yina Yandi fidisaka beno.

<sup>141</sup> Beno bambuka moyo, Biblia ke tuba, na ntangu mosi mutindu ya vwandaka na bilumbu ya Elie, na kilumbu mosi mutindu ya vwandaka na bilumbu ya Jean, ti Malachie 4 ke vutuka dyaka na ntoto. “Mu ke fidisa Elie.”

<sup>142</sup> Ntangu yayi beno vukisa yawu ve ntangu yayi na Malachie 3, “Mu ke fidisa munati-nsangu ya Munu na ntwala ya kizizi ya Munu.” Yina vwandaka Elie, mpe.

<sup>143</sup> Kasi na Malachie 4, Yandi tubaka, “Kaka ntete Kilumbu ya nene mpe ya mpasi ya Mfumu kukwiza, ntangu ntoto ya muvimba ke yokama na tiya mutindu dibulu ya tiya, mpe bantu ya kudedama ke tambula na zulu ya bombi ya bantu ya yimbi,” yina kele Millenium, “Mu ke fidisa profete Elie.” Mpe yinki yandi ke sala? “Yandi ke vutula lukwikilu ya bana na batata bantumwa,” kuvutula na Ndinga. Yandi fwana vwanda profete. “Mu ke fidisa yandi.” Yandi ke talisama na mutindu ya kulunga. Nkadulu ya Yandi ke vwanda mutindu mosi na yina vwandaka ya Elie, ya kieleka. Nsangu ya Yandi ke vwanda kaka na nzila yina. Yandi ke fundisa, ke mwangisa. Ke kondwa kimpangi, ke kondwa kimvuka, ke vwanda na kima mosi ve, kasi yandi ke vwanda na MUTINDU ME TUBA MFUMU.

<sup>144</sup> Ntangu yayi, beno bambuka moyo, ya vwandaka na bimvuka ya mutindu na mutindu yina telamaka mpe tubaka, “*Yayi* kele robe ya Elie, mpe *yayi* kele malongi ya Elie.” Kimvuka ya muvimba, organisation, kotaka na nkonga ya Elie, to robe ya

Elie. Yina kele Masonuku ve. Nzambi me salaka ata fyoti ve na kimvuka ya mutindu yina.

<sup>145</sup> Ntangu Elie kotaka na kisalu, mpe Jean-Baptiste, bawu zole fundisaka bimvuka mpe organisation. Bawu salaka yawu ata fyoti ve. Yandi fundisaka bawu, mutindu bawu salaka; Elie na Jean, bawu nyonso zole. Ya kele ve kimvuka to denomination. Kasi bawu zole, na kati ya bantangu ya bawu zole, fundisaka bimvuka mpe ba-organisation.

<sup>146</sup> Na yina yinki? Kidimbu ya ntangu ya nsuka ya kieleka ke fidisa Ndinga ya ntangu ya nsuka. Elie fwana kota na kisalu, muntu ya me kupalama na mpeve yina; muntu ya mfinda, mpe nyonso yina, mpe yina ke zolaka yawu, mpe ke kota na kisalu samu na kusiamisa. Ntangu yayi beno tala mbote yina Masonuku ke tuba awa, mpe kuna beno ke vunama ve, beno me mona, kidimbu ya ntangu ya nsuka mpe Ndinga ya ntangu ya nsuka.

<sup>147</sup> Nzambi me salaka ata fyoti ve na kimvuka, kisika mosi ve na kati ya Masonuku. Yandi ke salaka na muntu mosi, samu ti muntu nyonso kele ya kuswaswana na yankaka. Muntu nyonso, misapi ya beto kele ya kuswaswana, bambombo ya beto kele ya kuswaswana, mutindu ya beto ya kusala kele ya kuswaswana. Yandi ke bakaka muntu mosi, Yandi lenda nata yandi na mutindu ya kulunga na ngwisani tii yandi lenda kuma Ndinga yina.

<sup>148</sup> Ya kele samu na yina Paul, yandi tubaka, “Samu ti mu vwanda na lunangu ve samu na bunene ya Luzayikisu, ya pesamaka na munu wanzio ya Satana.” Beno me mona? Matthieu sonikaka, Luc sonikaka, Marc sonikaka, bawu nyonso, kasi, bawu landaka kaka Yesu mpe sonikaka yina Yandi tubaka. Kasi Paul vwandaka na luzayikisu ya Nani Yandi vwandaka, beno me mona, ya kele kima yina yandi—yandi monaka. Luzayikisu ya yandi vwandaka nene mingi, Yandi bikaka yandi kusonika Biblia, mutindu Moïse na Ngwisani ya Ntama. Muntu yina ya nene, Paul, luzayikisu yina yandi kuzwaka, yandi zabaka ti Yesu ya Ngwisani ya Malu-malu vwandaka Yehowa ya Ngwisani ya Ntama. Yandi vwandaka na luzayikisu ya Yawu, mpe lendaka kulakisa yawu na ba-Hébreux, na...mpe dyaka na—na ba-Romain, mpe na ba-Ephésien, mpe—mpe na nyonso. Yandi—yandi sonikaka mikanda yayi. Beno tala, na manima kidimbu ya Yandi kutalanaka, na manima yandi sonikaka mikanda.

<sup>149</sup> Nkadulu ya nkwezulu yayi ke vwanda mutindu mosi. Ya ke vwanda ve kimvuka. Ya ke vwanda muntu mosi. Nzambi salaka ata mbala mosi ve mutindu yankaka kasi na muntu mosi. Ntangu yayi, Elie vwandaka kimvuka ve, Jean-Baptiste vwandaka kimvuka ve, bawu vwandaka muntu mosi. Nzambi, Malachie 4, me tuba ve, “Mu ke fidisa nkonga mosi.” Ya ke tuba, “Mu ke fidisa Elie!” Ndinga lenda soba ve.

<sup>150</sup> Ntangu yayi, beno tala mbote, kidimbu ya ntangu ya nsuka mpe Ndinga ke kwiza na nzila ya Masonuku mutindu yawu silamaka.

<sup>151</sup> Beto zola kuzaba yinki ke vwanda kidimbu ya nsuka? Yesu tubaka na beto, na Matthieu 24 mpe 25. Tubaka na beto, dyaka, na Apocalypse, nzila nyonso kubanda ya 6...to ya 1, tii na, mbote, kapu ya 10. Na manima Yandi ke kwiza na kapu 19, Millenium ke banda na nkwezulu ya Yandi, na zulu ya mpunda ya pembe.

<sup>152</sup> Ya ke kwiza, kidimbu ya ntangu ya nsuka, beno kuwa ntangu yayi, samu na kumanisa, ya ke kwiza kaka mutindu Masonuku me tuba. Ntangu yayi beno tala Ndinga ya kidimbu.

<sup>153</sup> Ntangu yayi, Yesu, na Luc 17:30, silaka kidimbu ya ntangu ya nsuka. Kidimbu ya nsuka, vwandaka Nzambi me monisama na kati ya nzutu ya muntu yina lendaka swasikisa mabanza yina vwandaka na mabanza ya Sarah, na kati ya tenta na manima ya yandi. Yawu yina Yandi tubaka. Ya kele kidimbu yina Yandi silaka na nsuka. Ju- . . . Yinki Yandi tubaka ti yandi ke sala? “Ya ke zabana na bilumbu, na bilumbu ya nsuka, ntangu Mwana ya muntu ke monisama.” Ke monisama! Ntangu Mwana ya muntu ke monisama, yina ke vwanda kidimbu Yandi ke monisama. Ntangu yayi beno mona kana Yawu ke tuba yawu ve. Ya kieleka ke tuba.

<sup>154</sup> Ntangu yayi beno lenda tuba, ti, “Ve, ya ke vwanda kima yankaka. Ve, ya ke vwanda kutunga yinzo mosi ya nene, *yayi* ya nene, to *yayi*, to mwa lukutakanu mosi ya oecumenique ya nene, to kima yankaka?” Oh, ve. Ve, yina kele ntama mingi na nzila. Yina kele na lweka yankaka. Ya kele na ngaanda ya yina Nzambi tubaka na kusalaka, Yandi ke sala.

<sup>155</sup> Beno tala yina beto me tuba ntangu yayi. Masonuku ke vwanda kaka kieleka, samu ti beto kele na kidimbu ya Sodome, landila yinza. Na wapi ntangu ya vwandaka na ba-homosexuel mingi, kubalula ya bima mingi mpe nyonso, mutindu ya kele ntangu yayi, “nsungi ya yimbi mpe ya kindumba,” samu ti beno lenda mpe ve kunamisa televisyo ya beno kaka ti ya kele na mutindu mosi ya bima ya mvindu, ya busafu ya Hollywood ve? Mpe bantu, ke bokila bawu mosi Miklisto, ke vwanda na yinzo samu na kumona mambu ya mutindu yina na kisika ya kukwenda na lukutakanu ya bisambu. Ya ke lakisa wapi mpeve kele na kati ya beno. Kieleka. Mpe bakento ke lwata kaka mutindu bawu yina, mpe babakala ke bika bawu kutwadisa bawu mutindu bawu ke salaka kuna. Beto ke sala Hollywood kifwani ya beto, to beto ke kwikila Ndinga ya Nzambi na zulu ya yawu?

<sup>156</sup> Mpe kimvuka yina mosi lenda mona Ndinga ya Nzambi kupesa kimbangi, mpe yinki bawu ke sala? Bawu ke seka yawu. Samu ti, bawu kele ya kufwa, ya kufwa ya Seko. Bawu ata mbala

mosi ve vwandaka ya moyo. Kana bawu vwandaka ya moyo, bawu ke vwanda ntangu nyonso ya moyo, ya Seko. Kasi bawu ata mbala mosi ve vwandaka ya moyo. Ba vwandaka ntangu nyonso ya kufwa. Oh, ba lendaka vwanda ya kubongisa, mpe ke kwikila *yayi, yina, to yankaka.*

<sup>157</sup> Yesu tubaka, “Beno bantu ya luvunu,” na bawu, na banganga-Nzambi ya bawu na kilumbu yina. “Wapi mutindu beno lenda tuba bima ya mbote, na yina ya kele na kifuluka ya ntima yinwa ke zonzaka? Beno ke bokila Munu mbote, ‘Rabbi ya Mbote, Mulongisi ya mbote?’” Yandi zabaka yina vwandaka na kati ya ntima ya bawu. Yandi zolaka zaba yina vwandaka na kati ya ntima ya bawu. Yandi vwandaka Ndinga.

<sup>158</sup> Biblia me tuba, “Ndinga ya Nzambi kele mbele ya meno zole, mpe ke swasikisa mabanza yina kele na kati ya ntima.”

<sup>159</sup> Ntangu yayi, kidimbu yina ya Sodome me vutuka, na mutindu ya yinza. Mpe kana bima nyonso kele kaka kieleka landila mutindu ya fwana vwanda na yinza, na yina wapi mutindu beno lenda bika yawu, na mabanza ya beno, ti kimpeve kele ve awa na ntangu mosi? Ba-cadre nyonso zole kele na kati ya kisalu. Yinga, muntu nyonso ke ndima, yinza kele ya kusungama; kasi, oh, na kimpeve, bawu zola ve kukwikila yawu, samu ti Yawu ke kabwana na malongi ya bawu.

<sup>160</sup> Luc 17 kele kidimbu. Luc 17 kele kidimbu yina Yesu tubaka, ti, na bilumbu ya nsuka, bayinsi mpe mabuundu mpe bantu ke vwanda kaka mutindu yawu vwandaka na Sodome, yinza ya Bantu ya makanda, kaka na ntuala ya kuyokama ya Sodome. Mpe ya ke vwanda na nkonga mosi, ke vwanda na kuingila, mutindu Abraham. Beno vutukila, na ntangu Yesu tubaka, “mutindu yawu vwandaka na bilumbu ya Sodome,” beno vutukila mpe beno mona yina yawu vwandaka na Sodome. Yandi tangaka Biblia mosi yina beto ke na kutangaka, Biblia mosi, ntangu yayi beno vutuka mpe beno tala yinki ya vwandaka.

<sup>161</sup> Awa vwandaka na nkonga yina ba soolaka, yina ba bokilaka na kubasika, nkonga ya Abraham, bawu vwandaka vingila mwana ya nsilulu. Bantu ya Sodome kwikilaka kima mosi ve samu na yawu. Mpe ya vwandaka na mosi ya madidi ve tiya ve, mambele ya dibuundu kuna na Sodome. Beno tala Bawanzio tatu yina kwizaka mosi na mosi ya bawu, beno tala mbote wapi bidimbu bawu lakisaka, kuna beno ke mona na wapi bidimbu beto ke na kuzingila.

<sup>162</sup> Ntangu yayi, yina ke vwanda kidimbu. Mpe ndinga ya kidimbu ke vwanda Malachie 4, “samu na kuvutula bantu na Lukwikilu ya bantumwa ya batata.” Kidimbu yawu yina, Ndinga yawu yayi, ya kieleka landila Masonuku. Beno me mona? Kidimbu kele kidimbu yina yawu vwandaka na Sodome, Nzambi yina me monisama na kati ya bantu.

Mpe Yandi tubaka, “Wapi kisika kele kento ya nge, Sarah?”

Yandi tubaka, “Yandi kele na kati ya tenta, na manima ya Nge.”

163 Yandi tubaka, “Mu ke kwiza tala nge landila ntangu yina mu silaka nge.” Mpe Yandi tubaka . . .

164 Mpe Sarah, na manima, na manima ya Yandi, tubaka, “Wapi mutindu ya lenda vwanda, munu kiboba ya kento, yandi kiboba ya bakala? Mpe mutindu bakala ya munu kuna, kiboba ya bakala,” yandi tubaka, “beto ke na kima ya mutindu yina ve na beto.” Yandi tubaka, “Ya lenda vwanda kaka ve.”

165 Yandi tubaka, “Samu na yinki Sarah me tula ntembe na yawu, na kutubaka na kati ya ntima ya yandi, ‘Wapi mutindu bima yayi lenda vwanda?’”

166 Mpe Yesu tubaka ti ya ke vutuka dyaka. Ntangu yayi, beno bambuka moyo, Abraham bokilaka Muntu yina, “Elohim,” Nzambi. Nzambi Yandi zolaka vwanda. Samu na yinki? Yandi zolaka swasikisa mabanza, mpe Yandi vwandaka kieleka na ntangu ya mbote. Mpe Elohim, Mpeve-Santu, (muntu yankaka ve) Muntu mosi yina ke vutuka na dibuundu mpe ke sala kima mutindu mosi, yina ke vwanda kidimbu. Mpe Ndinga ke vwanda, “Kubokila bawu na kuvutuka na Ndinga, vutula dyaka Lukwikilu ya bana na batata.” Yawu yina kidimbu mpe Ndinga.

167 Bidimbu ke ndimamaka ntangu nyonso, kasi Ndinga ve. Bawu ke zolaka Ndinga ve, kasi bawu ke baka kidimbu. Bawu ke bakaka yawu, ntangu nyonso. Bawu ke zolaka kidimbu, samu bawu ke zolaka kutala yawu, na kuyangidisa bawu. Kasi, Ndinga, bawu zola ve ku—kundima yawu. Beno bambuka moyo ntangu yayi, Ndinga.

168 Beno vutuka dyaka na Ndinga. Kidimbu ya Yesu ya Mesiya, landila Esaie 35, “Kikata ke dumuka mutindu mbuluku,” mpe nyonso yayi.

169 “Ya vwandaka mbote mingi!” Oh, bawu ndimaka yawu. Yina vwandaka mbote. Bawu kwikilaka yawu. Bawu kwikilaka kidimbu. “Kwiza, Rabbi, na dibuundu ya munu, beto ke pesa Nge lusalusu nyonso. Kieleka, beto ke kwikila Nge. Nge kele ya kulutula mbote. Nge kele Rabbi. Nge kele Profete ya ntwenya. Kwisa kota! Ngwisani ya mutindu na mutindu! Kidimbu kele mbote.”

170 Kasi ntangu Ndinga zonaka, mpe tubaka, “Munu na Tata ya Munu kele Mosi.”

171 Oh, la la, bawu lendaka kwikila Yina ve. “Nge ke kukisala Nge mosi Nzambi.” Bawu zolaka Ndinga ve. Bawu zolaka kidimbu. Bawu zaba yawu, bawu ndimaka ti yawu vwandaka kidimbu ya Mesiya, kasi, Ndinga, bawu zolaka Yawu ve.

“Beno mpe ke sala bisalu yina Mu ke sala.”

Mpe bawu tubaka, “Yandi kele Béélzébul.”



Yandi tubaka, “Beno nsungi ya banyoka.”

<sup>172</sup> Oh, bawu yinaka Ndinga yango. Yinki bawu salaka? Bawu basisaka Ndinga yango na kati-kati ya bawu. Bawu basisaka Yandi.

<sup>173</sup> Yesu tubaka, “Kana bawu ke bokila Mfumu ya yinzo, ‘Béelzébül,’ wapi mutindu ya kulutila bawu ke bokila bilandi ya Yandi?”

<sup>174</sup> Beno bambuka moyo, na Apocalypse 3, na Nsungi ya Laodicée. Yayi kele Laodicée; kidimbu ya Sodome ke kwiza. Ndinga, “Vutuka na Ndinga, ntama na ba-credo mpe ba-denomination yayi, mpe vutuka na Ndinga,” ntangu Yawu kwizaka, landila Apocalypse 3, ba tulaka Yandi na ngaanda ya dibuundu, kaka mutindu ya wwandaka kuna.

<sup>175</sup> “Kidimbu kele mbote, kasi Ndinga ve.” Bawu zola sala kima mosi ve na Ndinga. Ve, ve; Ndinga. Kasi Moise tubaka, kana bawu zola ve, to. . .

<sup>176</sup> Nzambi tubaka na Moise, “Bawu kwikila ve ndinga yina ya ntete ya kidimbu ya ntete, meka bawu na ndinga ya zole. Mpe kana bawu sala yawu ve, na yina kwenda baka mwa maza mpe tiamuna yawu na zulu ya ntoto.” Yina ke sukisa dyambu. Kaka yina. “Sukula, kusuna putulu na makulu ya nge,” na nzonzolo yankaka, mutindu Yesu tubaka. Yandi tubaka, “Baka mwa maza ya nzadi, tiamuna yawu na zulu ya ntoto, ya ke kuma menga, mpe ke lakisa ti ya kele na kati ya yina yandi ke yobila, na menga.” Na yawu ya kele kaka kieleka yina ya wwandaka.

<sup>177</sup> Kana bawu kwikilaka ve kidimbu, na yawu kidimbu ya tatu simbaka yawu ya kieleka. Ba-ministere nyonso kele na bidimbu tatu, kana ya kele Nzambi me fidisa yawu. Yesu wwandaka na bidimbu tatu. Moise wwandaka na bidimbu tatu. Noé wwandaka na bidimbu tatu. Elie wwandaka na bidimbu tatu. Bima nyonso ke kwizaka na bidimbu tatu. Beno tala. Beno kuwa, bankundi.

<sup>178</sup> Ngunga me luta fyoti. Mu kele. . . Oh, la la, mu zabaka ve ti ngunga wwandaka me luta mutindu yayi, na manima ya baminuti kumi na tanu.

<sup>179</sup> Kana beno lenda kwikila kidimbu ya Sodome, na Luc, beno me mona, mutindu Yandi silaka yawu; beno ke kwikila kidimbu ya Sodome, na yina samu na yinki beno lenda ve kundima Ndinga ya Malachie yina ke landa kidimbu, na “kuvutuka na Ndinga”? [Kisika ya mpamba na bande—Mu.] Biblia me tuba mutindu yina, mpe beno ke mona yawu, na yina beno kuwa Ndinga ya kidimbu.

<sup>180</sup> Beno tina nganzi ke na kwiza! Beno banza ve, “Samu ti mu kele ya UPC, ya ba-Assemblée de Dieu, ya ba-Methodiste, ya ba-Baptiste, ya ba-Presbyterien, mu kele na muswa ya kukota.” Nzambi kele na lenda na matadi yayi kubasisa bana samu na Abraham. Beno vutuka na Ndinga! Beno vwanda ntama

na ba-isme ya beno ya yinza mpe basysiteme ya beno ya ba-organisation, mpe nyonso yina. Nzambi ke bebisa bawu na ntswala ya ntoto. Yandi ke kotisa yawu na kati ya mubu ya kuzimbana, kaka mutindu Yandi salaka Egypte ntangu Yandi bokilaka Israel, yinsi na kubasika na yinsi. Ntangu Yandi ke bokila Kento ya makwela na kubasika na dibuundu, yandi ke luta na balukwamusu, ke losa menga ya yandi na zulu ya ntoto. Beno tina nganzi yina ke na kwiza, samu ti ya me kuma pene-pene!

<sup>181</sup> Beno lenda ve kumona bima yayi kukondwa. . . Mu zaba ve yina beno ke banza samu na yawu. Mu kele kaka na kizitu ya kutanga yawu mpe kuzonzila yawu. Ya me tala beno! Beno lenda kwikila kidimbu, na yina beno kwikila na Ndinga yina ke landa kidimbu. Oh, la la!

<sup>182</sup> Beno tala, Moise, kifwanukusu ya kubasika ntangu yayi. Yandi zolaka tuba na bantu yina na nsilulu yina ba pesaka na batata. “Mu ke bambuka moyo na nsilulu ya Munu na batata ya bawu.” Mpe ntangu yayi yinki—yinki Moise ke sala? Kuvutula bantima ya bantu na yina batata tubaka. Mpe mutindu Moise vwandaka kuna, mutindu mosi kele Malachie 4, “ke vutula bantu na Lukwikilu ya batata.”

<sup>183</sup> Bakusala nyonso yayi ya ba-dénomination, mpe nyonso yankaka yina, beno vutuka na Ndinga! Mu zaba ti beno, bantu mingi ke zolaka kusala yawu; mu ke nganina beno ve awa. Bandede yayi ke kwenda bisika nyonso na yinza, beno me mona, bisika nyonso. Mu ke nganina beno ve, kasi mu ke nganina muntu nyonso yina ya kele, kisika ya kele. Mu kele mukuni Nkuna. Ya kele nyonso mu zaba na kusala. Ya me tala beno na kubaka lukanu. Beno tina nganzi yina ke na kwiza, bantu!

<sup>184</sup> Beno banza ve samu ti beno kele Pentecotiste. Beno banza ve samu ti mama ya beno vwandaka Methodiste ya mbote, ya kusantisama, to papa ya beno vwandaka muntu ya Baptiste, yina vwanda bokaka mbote. Beno banza ve ti ya ke vwanda na kima ya kusala na beno. Beno banza ve samu ti beno kele ya dibuundu yina ba ke na kutungaka, to dibuundu yina beno ke na kutungaka ntangu yayi. Beno banza ve samu ti beno bantu ya Pentecote zonzaka na bandinga mpe binaka na Kimpeve, mpe dumuka mpe kulumukaka na yisi, bamvula makumi yiya me luta. Beno banza ve samu ti beno kuzwaka balukutakanu ya kubeluka ya nzutu, mpe nyonso yina.

<sup>185</sup> Beno kondwa ve na kumona kidimbu yina, ya Dikunzi ya Tiya, yina Nzambi me siamisa; mpe Ndinga na manima ya Yawu, na kubaluka, na Nzambi. Beno bika Yawu ve kuluta beno. Ya kele na kidimbu mpe Ndinga.

<sup>186</sup> Ntangu muntu ke telama na kidimbu, lukolo mosi ya ntama ya mabanza, ya kele na kima mosi ke tambula mbote ve, ya me katuka na Nzambi ve. Oh, la la! “Benosungika nzila ya Yandi

ntangu yayi!” Ntangu yayi, beno ke kwikila yawu? “Na yina beno vutuka, O mpofo mpe beno yina mwanganaka, na ya beno.” Biblia . . . Musoniki ya nkunga tubaka:

Bayinsi ke na kupanzanaka, Israel ke na kuvumbukaka,  
Bidimbu yina Biblia zabisaka na ntuala;  
Ba ke tanga bilumbu ya Bantu ya makanda, ba me fuluka na boma;  
“Beno vutuka, O nge yina me zimbana, na yina ya nge.”

<sup>187</sup> Beno vutuka! Beno vutuka! Profete tubaka, “Ya ke vwanda na Nsemo na ntangu ya nkokila.” Kaka ntete Mwini kubasika ya muvimba ya ndombe, ya ke vwanda na Nsemo. Beno tambula na Nsemo na yina Nsemo kele. Na manima ya mwa ntangu fyoti Conseil Oecuménique ke kuzwa beno, mpe ya kele ve na nzila samu na Nsemo kuna.

Beto kulumusa bayintu ya beto.

<sup>188</sup> Tata ya Mazulu, ya kele na maboko ya Nge ntangu yayi. Mu—mu me kuna Nkuna. Mu zaba ve kisika Yawu me kubwa. Mu ke sambila ti Nge ke sakumuna Yawu konso kisika yina Yawu kele. Mpe bika ti Yawu kuzwa kisika ya Yawu na yisi, mpe kuluta bisika nyonso ya matadi, mpe misisa nyonso ya ntinta ya saka-saka, mpe mutindu ya vwandaka, mpe kukatula kukondwa lukwikilu nyonso na nzila. Pesa yawu, Tata. Beto me pesa yayi na Nge, na Nkumbu ya Yesu Klisto. Amen.

<sup>189</sup> Na bayintu ya beto ya kukulumusa, meso ya beno ya kukanga. Mbasi na nkokila ke vwanda feti ya nene. Bansumuki ya mbanza, mu ke . . . kana Mfumu kuzola, mu ke tuba na bawu. Mu ke na kutuba na dibuundu ya bantu mingi ntangu yayi. Mu ke meka ve na kulonga yayi; ya ke sala kaka bawu kukuma muntu ya kufwa meso mingi kulutula ntangu nyonso, na lukutakanu ya mutindu yina.

<sup>190</sup> Kasi, beno, na nkokila yayi, beno ke kwikila ti beno me mona kidimbu, mpe beno lenda kuwa Ndinga, kana beno me sala mpe beno ke kwikila? Mpe beno—beno sala ve, beno me kwikila kasi beno me ndima Yawu ntete ve, Klisto na muvimba ya Yandi, beno zola kutelemisa diboko ya beno? Mpe ti bayintu nyonso kuvwanda ya kukulumusa ntangu yayi, mpe meso nyonso ya kukanga. Beno telemisa diboko ya beno, beno tuba, “Bambuka moyo na munu, Mpangi Branham, na yina nge ke sambila.” Mu ke sepela na kusala yawu. Nzambi sakumuna beno.

<sup>191</sup> Tata ya beto ya Mazulu, Biblia me tuba, “Bayina nyonso kwikilaka bakaka mbotika.” Mu ke sambila, Mfumu, ti bantu yayi yina me telemisa maboko ya bawu, ti bawu ke kwikila na yawu, bawu me botama ve na mbotika ya Miklisto, ti bawu kuzwa dibuundu yina ke salaka yawu, mpe kuzwa mbotika. Pesa yawu, Mfumu.

<sup>192</sup> Ti bawu vwanda kaka ve ya kubotama na maza, yina kele kaka kidimbu ya ngaanda ti kima mosi na kati me salama. Biblia me tuba, “Ya kele na Lukwikilu mosi, Mfumu mosi, mbotika mosi,” mpe mbotika yina kele mbotika ya kimpeve. Nzutu yina ba me sukula, ya kele kaka kifwanukusu, to samu na kupesa kidimbu ti kima mosi na kati me salama. Kasi ya kele moyo yango yina fwana kuzwa mbotika na Mpeve-Santu, ya kele nkwezulu ya Seko na kati ya nkadulu ya yinza yina mpe kusoba yawu, samu na kusala yawu mukwikidi. Mu ke sambila ti bawu ke kuzwa Mpeve-Santu. Mu me pesa bawu na Nge ntangu yayi, mutindu ba-trophée ya Nsangu, mpe ya lemvo ya Klisto. Na Nkumbu ya Yandi, mu me sambila. Amen.

Ntangu yayi na bayintu ya beno ya kukulumusa, na buzitu nyonso.

<sup>193</sup> Mu me bikana kaka na baminuti sambwadi, mu—mu me lenda ve kumanisa na ntangu ya mbote. Mu—mu—mu lenda vwanda ve na ndonga ya bisambu na ntangu yina. Mu ke lombana na beno na kuvwanda kaka kisika beno kele. Beno lemvo kila munu na kubaka beno ntangu ya yinda. Beto ke sambila samu na mosi na mosi. Beno bantu, bayankaka ya beno awa yina kele na bakalati ya bisambu, beno vwanda na boma ve, beto ke baka beno.

<sup>194</sup> Kasi beto ke mona kaka kana Mpeve-Santu ke monisa na beto ntangu yayi, kana beno ke kwikila na Yandi mpe beno ke kwikila ti yayi kele kidimbu. Beno bambuka moyo, Wanzio, Yandi vwandaka muntu; Yandi kudiyaka, Yandi kunwaka na ntuala ya Abraham, mpe kasi Yandi lendaka, mpe Sarah na kati ya tenta, Yandi lendaka kuswasikisa mabanza yina vwandaka na kati ya ntima ya yandi. Yina vwandaka kidimbu. Yandi vwandaka Ndinga. Ntangu yayi kana Ndinga lenda kwiza kaka na beto, kuna, dyaka, Yandi silaka na kulungisa kima ya mutindu mosi.

<sup>195</sup> Ntangu yayi beno bayina kele kuna na kati ya kivinga, bayina kele ve na bakalati ya bisambu, mpe beno zaba ti beno ke vwanda ve na ndonga, mu zaba kumona ve yina kele yina, kana ti Mfumu kulakisa munu. Mu ke. . . Mpe beno ke kwikila ti Nzambi kieleka ke belusaka mbevo. Mu—mu zola ti beno kwikila kaka ntangu yayi, samu na mwa ntangu fyoti. Mpe beno sambila kaka, mpe beno tuba, “Mfumu Yesu, mu zaba bakala yayi, yina ke tuba, yandi kele—kele muntu, kasi yandi me tuba na munu yawu, me tuba na beto na nkokila yayi, mpe me lakisa yawu na beto; ti, Mpeve-Santu, ti yinza lenda kufwa ve.”

<sup>196</sup> Ba lendaka kufwa Yesu ntangu Yandi vwandaka na nzutu; ba kufwaka Yandi. Kasi ntangu yayi Yandi me vumbuka, na mutindu ya nkembo, ba lenda ata mbala mosi ve kufwa Yandi dyaka. Mpe Yandi tubaka, “Na mwa ntangu fyoti mpe yinza ke mona Munu dyaka ve. Kasi, beno,” bayina ba soolaka ntete,

bayina ba soolaka samu na Luzingu ya Seko, Dibuundu, Kento ya makwela, “beno ke mona Munu, samu ti Mu ke vwanda na beno, ata mpe na kati ya beno, tii na nsuka. Bima yina Mu ke sala beno mpe ke sala yawu.” Bansilulu yayi nyonso yina Yandi salaka.

<sup>197</sup> Ntangu yayi, mu zaba ntangu Yandi vwandaka awa na zulu ya ntoto, Yandi, Nzambi vwandaka na kati ya Yandi. Yandi vwandaka Nzambi. Yandi vwandaka muvimba ya Nzambi. Yandi vwandaka Ndinga nyonso ya Nzambi yina me monisamaka.

<sup>198</sup> Mpe Biblia kele dyaka Nzambi, Ndinga, mpe ya kele na bayankaka ya luzayikisu yina fwana monisama dyaka. Mpe Yandi tubaka, “Na bilumbu ya nsuka, ntangu yinza ke kuma dyaka mutindu Sodome, Mwana ya muntu ke monisama.” Mpe kidimbu ya Sodome ke vutuka, na yina Ndinga ke bokila dyaka bantu, bayina ba kubikaka na Luzingu.

<sup>199</sup> Beto zaba, ntangu Yandi vwandaka awa, ya vwandaka na mafuku ya bantu na zulu ya ntoto, yina zabaka ata fyoti ve ti Yandi vwandaka awa; ya kele ve samu na kuzaba. Beno me mona? Yandi kwizaka na bayina ba soolaka ntete samu na kumona yawu.

<sup>200</sup> Ntangu yayi beno sambila. Ntangu yayi beno vwanda kieleka swi. Beno ningana ve. Kisika nyonso beno kele, na zulu ya balcon, na étage ya yisi, bisika nyonso beno kele, beno—beno ningana ve, beno vwanda kaka swi, mpe beno sambila.

<sup>201</sup> Beno tuba, “Mfumu Yesu, Biblia ke tuba, na Hébreux 4, ti Nge kele kaka ntangu yayi ‘Nganga-Nzambi ya Ntete yina lenda simbama na nsatu ya bimbevo ya beto.’ Mpe beto ke mona Nge na zulu ya ntoto, ntangu Nge vwandaka awa na zulu ya ntoto, mwa kento mosi kilumbu mosi simbaka lele ya Nge, mpe Nge balukaka, mpe tubaka, ‘Nani me simba Munu?’” Yandi bumbanaka yandi mosi, kasi dyaka lukwikilu ya yandi kutalisamaka. Yesu tubaka na yandi samu na dyambu ya yandi ya menga, mpe tubaka “lukwikilu ya yandi vulusaka yandi.” Ntangu yayi Yandi kele Nganga-Nzambi mosi yango ya Ntete. Kana Yandi kele mutindu mosi mazono, bubu yayi, mpe ntangu nyonso, Yandi fwana sala na mutindu mosi, kana beno—kana beno simba Yandi.

<sup>202</sup> Mpe yinki yawu ke sala kuna? Ya fwana vwanda na nzutu ya muntu, na zulu ya ntoto, samu na kutuba Ndinga ya Yandi. “Mu kele Vinu, beno kele mavala.” Ya kele ve na mutindu ya kubaluka na yawu, bankundi. Ya kele kaka Masonuku. Ya kele Kieleka. Beno milongi ke kwikila yawu, na manima kuna?

<sup>203</sup> Ntangu yayi kuna, beno vwanda kaka kieleka na luzitu mpe beno sambila, beno tuba, “Mfumu Yesu, bika mu simba lele ya Nge.”

<sup>204</sup> Mpe beno ke mona, yina kele pene-pene ya munu, kele ntama na kutala bametele sambanu to kulutula yina. Mu zaba ve mwela

na ngaanda kuna. Mu lenda mona muntu mosi ve yina kieleka mu zaba, na nkokila yayi, ya kuvwanda kuna; kana Pat Tyler yina kele ya kuvwanda awa na mantwala, nkundi ya munu. Ya kele na bantu na ba-civière, na ba brancard.

<sup>205</sup> Beto monaka muntu ya kulala na brancard mazono na nkokila, mpe bakala yango kutelamaka mpe yandi tambulaka. Samu na yinki beno nyonso ve, na nkokila yayi? Beno me mona, beno kwikila kaka, yawu yina kaka beno fwana sala. Mvwandulu ya Yandi ke sala yawu. Yandi kele awa, beno fwana telama na lweka ya Yandi samu na kuvumbula beno na bilumbu ya nsuka.

<sup>206</sup> Ntangu yayi, beno bayina ke kwikila, mpe ke banza ti beno ke na kusimbaka Yandi na kisambu ya beno, beno tala kaka lweka yayi ntangu yayi.

<sup>207</sup> Mutindu Pierre na Jean tubaka, “Tala beto.” Mpe bawu talaka na bukebi nyonso, muntu yango salaka, na kuvingilaka na kumona kima mosi. Yandi tubaka, “Mbongo mpe wolo kele na munu ve, kasi yina kele na munu . . .”

<sup>208</sup> Ntangu yayi, kubeluka kele na munu ve, kasi yina kele na munu, dikabu ya Nzambi, mu ke pesa beno. Kana beno ke kwikila yawu kaka, Nzambi ke sala yawu. Mu ke lomba kaka beno na kukwikila yawu. Yina mu ke na yawu, mu ke pesa na beno. Kana beno ke kwikila yawu, Nzambi ke sala yawu. Beno meka yawu kaka.

<sup>209</sup> Awa, Yawu yayi kaka ntangu yayi. Amen. Mu zola yawu. Ya kele na mama mosi ya kuvwanda kaka awa. Yandi kele mwa nene, ya kuvwanda kaka awa na nsuka. Nge kele na kalati ya bisambu, mama? Kele mwa nene. . . Nge kele ve. . . Kaka awa, nge kele ve na kalati ya bisambu? Yinga. Nge kele na kalati ya bisambu ve? Nge ke kwikila, kaka? Nge kele na nsatu ya kalati ya bisambu ve, kana nge kwikila.

<sup>210</sup> Ya kele na ndinga ke vutukila, ya kele samu na yina ya kele mpasi na kubokila bantu mutindu yayi, kasi beno meka na kuwa munu mbote mutindu beno lenda ntangu yayi.

<sup>211</sup> Mu zaba nge ve. Nge kele na kalati ya bisambu ve, na yawu nge ke vwanda ve na estrade. Kana Nzambi monikisa munu yina kele mpasi ya nge, nge ke kwikila ti (yinki?) ya ke vwanda kaka kima mutindu mosi kaka mutindu Yandi monisaka na kento yina vwandaka mpasi ya yandi? Kento na dibulu ya maza? Sarah, yina yandi tubaka, mpe nyonso yankaka yina? Nge ke kwikila yawu? Nge ke kwikila ti ya ke vwanda nyonso mbote?

<sup>212</sup> Nge ke na kimbevo ya menga, kima mosi ke tambula mbote ve na menga ya nge. Kana ya kele kieleka, telemisa diboko ya nge. Mbote mingi. Nge kele na yawu ve ntangu yayi. Ya me kuma Nsemo na zulu ya nge. Yesu Klisto me pesa nge lukumu.

213 Ntangu yayi, mu me monaka ntete ve kento yayi, na luzingu ya munu. Ntangu yayi yinki ya kele? Ya fwana vwanda Mpeve. Ntangu yayi beno lenda tuba mutindu ba-Pharisien, “Yina kele dyabulu,” mbote, beno ke kuzwa musendo ya bawu. Beno tuba, “Ya kele Klisto,” beno ke kuzwa musendo ya Klisto. Mu ke kwikila ti ya kele Ndinga me talisama na kilumbu yayi ya nsuka; munu ve.

214 Awa, awa kele na mama yankaka ya ntwenya yina me vwanda awa. Yandi ke na kimbevo ya misisa na makulu ya yandi. Yandi kele na bampasi mingi. Yandi kele na mpasi ya ntima. Yandi ke na kusambila samu na muntu ya luzolo, yina kele mpangi ya bakala. Yandi ke na kudilaka ntangu yayi. Yandi kele na kiwisa. Mpangi ya bakala yina kele kieleka na mpasi. Ya kele kimbevo ya diabete. Mpe, dyaka, yandi kele na kivudi yankaka, yandi kele nsumuki. Mpe nge ke na kusambilaka samu na yandi. Ya kele kieleka. Mademoiselle Welt, kana nge ke kwikila na ntima ya nge ya muvimba, Nzambi ke sala yawu samu na yandi. Nge ke kwikila yawu? Yina kele bankumbu ya nge.

215 Ntangu yayi ya kele ya kulutila na yina Yesu tubaka na Simon, “Nkumbu ya nge kele Simon, nge kele mwana ya Jonas”? Beno vwanda kaka na lukwikilu. Beno tula ntembe na yawu ve. Beno kwikila yawu na ntima ya beno ya muvimba. Kana beno ke kwikila yawu, Nzambi ke lungisa yawu. Kana beno lenda kaka . . .

216 Awa, awa kele na mama mosi ya ntwenya ya kuvwanda awa, yina ke na kutalaka kaka na munu awa. Yandi kele na mutindu ya bansuki ya mbwaki. Bansuki ya yandi kele ya kubaluka na manima.

217 Beno lenda mona ve Nsemo yina, mutindu ya bumbwaki, kubaluka na zulu ya kento yango? Yandi zaba ti ya ke na kusalamaka kaka ntangu yayi, samu ti yandi ke kuwa Yawu. Ya me belama mingi na yandi, yandi lenda ve kusadisa na kuwa Yawu. Kana ya kele kieleka, mama, telemisa diboko ya nge. Yandi yayi.

218 Ntangu yayi mu kele nzenza ya muvimba na nge. Mu zaba kima mosi ve na zulu ya nge. Kasi nge vwandaka kuna vwandaka sambila. Ya kele kieleka. Kana ya kele kieleka, pepisa diboko ya nge mutindu yayi. Ntangu yayi, kana Yesu Klisto kele Mwana ya Nzambi, yina Yandi kele, Nganga-Nzambi ya Ntete yina kele ya kuvwanda na diboko ya kibakala ya Nzambi . . . Mpe mu kele kaka ya kutelama awa na nzila ya dikabu, na munu mosi ya ku- . . . kudasika, kudasika kaka na mabanza ya kimuntu, kukondwa kubanza na mutindu ya munu mosi; mutindu ya kupemisa mabanza ya munu mosi mpe mabanza, mpe kubika kaka Nzambi kukota na kati. Nge ke kwikila ti Yandi . . . Munu, Nzambi zaba ti mu zaba nge ve; mpe nge mutindu mosi. Na yawu kana Nzambi ke talisa na munu mpasi ya nge, to kima yina nge

ke na kuvingila, ke na nsatu, to kima yankaka, nge ke kwikila ti Nzambi lenda, lenda sala yawu?

219 Nge kele na mpasi na mukongo ya nge. Ya kele mosi ya bima yina nge ke na kusambilaka. Mpe nge kele na mpasi na meso ya nge. Nge ke kwikila ti Nzambi ke belusa yawu mpe kukumisa yawu mbote? Nge ke kwikila? Nge ke kwikila? Nge ke kwikila ti Nzambi lenda tuba na munu nani nge kele? Mama Hall, nge ke kwikila na ntima ya nge nyonso ntangu yayi, nge lenda kuzwa yina nge me lomba. Nge ke kwikila?

220 Awa kele na kento mosi ya mwa mbuta yina me vwanda kuna na manima ya yandi kuna. Yandi ke na kusambilaka, mpe. Yandi kele na diabete. Mu banza ti yandi ke kondwa yayi ve. Ya kele kaka na zulu ya yandi. Yandi kele mwa mbuta. Kaka minuti, ti Mfumu kusadisa munu ntangu yayi. Yandi . . . Kuna yandi me simba yawu. Mbote mingi. Mu me mona ntangu yandi vwandaka me kota na ngwisani. Yandi me katuka awa ve. Yandi me katuka na Louisiane. Mbanza ya yandi—ya yandi kele kisika yina ba ke bokilaka Singer, na Louisiane. Mpe yandi kele na kimbevo ya diabète. Nkumbu ya yandi kele Mama Doyle. Kana ya kele kieleka, telemisa diboko ya nge. Mbote mingi. Mu kele nzenza ya muvimba na yandi, mu me monaka yandi ata fyoti ve na luzingu ya munu. Kasi Yesu Klisto, Mwana ya Nzambi, zaba nyonso na zulu ya beno.

221 Ya kele na mama mosi ya kuvwanda na manima kuna, yina me katuka na mbanza mosi, kisika ba ke bokilaka Singer. Yandi ke na tension ya menga. Mpe nkumbu ya yandi kele Clark. Nge ke kwikila, Mama Clark? Mbote mingi, nge lenda kuzwa yina nge me lomba.

Nge ke kwikila?

222 Kidimbu yawu yina! Beno kuwa Ndinga! Beno balula bantima, beno vutuka na Nzambi na nswalu nyonso! Yesu Klisto kele awa na Ngolo ya mvumbukulu ya Yandi; nsungi ya yimbi mpe ya kindumba ke kuzwa kidimbu ya Yesu Klisto yina ke zinga na kati-kati ya bantu. Yandi lendaka ve kusala yawu kaka na munu, ya fwana vwanda beno, mpe. Beno me mona, kento yina zolaka simba lele ya Yandi. Beno fwana simba lele ya Yandi. Beto kele kaka bisadilu.

223 Beno ke kwikila na ntima ya beno nyonso? Ntangu yayi kana beno ke kwikila yawu . . . Bantu yikwa ke kwikila yawu, beno telemisa maboko ya beno, mutindu *yayi*, beno tuba, “Ya kieleka mu ke kwikila yawu.”

224 Ntangu yayi kana beno ke kwikila yawu, Yesu tubaka yayi, “Bidimbu yayi ke landa bayina ke kwikila; kana bawu tentika maboko na zulu ya bambevo, bawu ke beluka.” Beno ke kwikila yawu?

225 Ntangu yayi ngunga me luta. Beto kele ve na ntangu. Beto me bikana na baminuti makumi zole na tanu ntangu yayi tii na



ngunga ya kumi. Beno lenda tentika kaka maboko ya beno na zulu ya mosi na yankaka, kuna? Mpe beno sala kaka mutindu mu ke tuba na beno ntangu yayi, beno tula kaka maboko ya beno na zulu ya mosi na yankaka.

<sup>226</sup> Ntangu yayi beno zaba, na étage, bisika nyonso beno kele. Ntangu yayi beno zaba, mbote mutindu nyonso ntangu yayi, na manima Masonuku me longama mpe me talisama pwelele nzila nyonso na kivinga.

<sup>227</sup> Mu ke mona yankaka, kaka na ntangu yayi. Beno me mona? Mpe yankaka dyaka awa, kimbevo ya prostate. Mama mosi na tuberculose. Uh-huh. Oh, Ya kele kaka bisika nyonso ntangu yayi, kasi Yawu ke lembisa beno.

<sup>228</sup> Wapi luswaswanu, yinki dyaka? Beno ke mona makumi tanu, na bantangu yankaka ya kele mutindu yina, mpe beno zola kumona makumi sambwadi na ntangu ke kwiza. Yesu salaka yawu kilumbu mosi na Sychar, mpe mbanza ya muvimba kwikilaka na Yandi. Ba vwandaka vingila Mesiya.

<sup>229</sup> Mesiya kele awa, Mpeve-Santu, Mesiya ya kilumbu yayi; Mesiya yina ke na kusalaka Ndinga kusiamisama, na nsilulu ya Yandi.

<sup>230</sup> Ntangu yayi mu zola ti mosi na mosi ya beno, na yina beno ke tentika maboko ya beno na zulu ya mosi na yankaka, kana beno kele mikwikidi. Ntangu yayi beno sambila ve samu na beno mosi. Beno sambila samu na muntu yina, mpe bawu ke sambila samu na beno. Ntangu yayi, Ndinga mosi yina silaka yayi na bilumbu ya nsuka, silaka mpe . . .

<sup>231</sup> Mpe beno bambuka moyo, Yesu tubaka, “Bidimbu yayi ke landa bayina ke kwikila.” Kubeluka ya nzutu, yina ke vutuka, kele ndinga ti kidimbu me ndimama. Bawu ke tentika maboko na zulu ya bambevo, mutindu kidimbu; ndinga kele “alleluia, Mfumu me belusa munu!” Ntangu yayi kana bidimbu yayi ke landa ndinga, kidimbu yina, kana beno kele mukwikidi, ya ke landa. Ndinga ke landa kidimbu.

<sup>232</sup> Kana mu pesa beno kidimbu yayi, ti mu tuba na beno yawu me katuka na Nzambi, mpe Nzambi silaka yawu na kilumbu yayi; ya me vwanda pwelele mingi, ya kele na kima ve kasi kaka mumpani lenda manga na kukwikila yawu. Beno me mona? Na yina Nzambi ke kwiza mpe ke siamisa yawu, samu na kusala yawu mutindu yina. Ntangu yayi Yandi kele awa.

<sup>233</sup> Ntangu yayi mosi na mosi, na mutindu beno ke sambilaka na dibuundu ya beno mosi, kana ya kele na beno mosi, na ngolo, nyonso yina ya kele, beno sambila samu na muntu yina beno me tentika maboko ya beno na zulu, samu bawu ke na kusambila samu na beno.


<sup>234</sup> Mpe ntangu yayi beno tala na zulu. Mpe na Mvwandulu ya Mesiya, Klisto, Yandi Yina vumbukaka na lufwa, ke zinga dyaka

na manima ya bamvula mafunda zole, wapi mutindu beto lenda vwanda ya kulemba mingi na Kimpeve? Yina zolaka tula yinsi yayi na Tiya. Yina zolaka sala Beaumont kubalula ntima, na saki mpe mbombi. Kasi ya ke sala yawu? Ve.

<sup>235</sup> Kasi beno bayina ke na kuvingila na Yandi, mpe ke kwikila ti Yandi ke sala yawu mpe ke zitisa Ndinga ya Yandi, ya kele na beno ntangu yayi nsilulu me pesama. Beno tula maboko ya beno na zulu ya muntu mpe beno sambila, na yina mu ke sambila samu na beno kubanda awa.

<sup>236</sup> Mfumu Yesu, mingi me tubama, mingi me salama. Ndinga yina ba silaka me monisama. Mesiya, Klisto ya Nzambi, kele na Mvwandulu ya Kinzambi. Beto ke kuwa Yandi. Beto ke mona Yandi. Beto zaba ti Yandi silaka yayi na bilumbu ya nsuka. “Mutindu yawu vwandaka na bilumbu ya Sodome, mutindu mosi yawu ke vwanda na ntangu Mwana ya muntu ke monisama.” Na yina, beto zaba.

<sup>237</sup> Beto ke mona tiya na mazulu, ba-bombe atomique. Beto ke mona bayinsi yina me beba, bayinsi ke na kupanzana. Beto ke mona ti Israel kele na yinsi ya yandi. Kidimbu nyonso yina ba lendaka kusila, me salama. Kima ya kulanda kele Mwana ya nsilulu, Nkwizulu.

<sup>238</sup> O Nzambi ya Seko, na Ntwala ya Yesu Klisto, Mpeve-Santu ya nene yina kele awa ntangu yayi na kusiamisa ti Yandi kele awa, kuwa kisambu ya bantu yayi, kuwa Miklisto yayi; ti, ntangu mu ke kwenda, ba tuba ve, “Mpangi Branham salaka yayi.” Muntu yankaka yina bawu zabaka ve, tentikaka maboko na zulu ya bawu, mpe bawu belukaka. Kasi Nge pesaka nsilulu ti Ndinga ke vwanda na kidimbu na yawu. Mpe ti bawu beluka, na yina mu ke pesa bawu na Nge, na Nkumbu ya Yesu. 

*NDINGA YA KIDIMBU* KNG64-0313

(The Voice Of The Sign)

Nsangu yayi ya Mpangi William Marrion Branham, kulongamaka na Kingelesi, na Kilumbu ya tanu na nkokila, na kilumbu ya 13 ya Ngonda ya tatu, na mvula 1964, na Salle Municipale na Beaumont, Texas, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)